

Apocalipsis

Pũhrũguere I Ʃmũ dohpa waborore marire masicũ iimi Jesucristo, arĩ gojañumi Ñu

¹ Ipũ mera Jesucristo ĩgu yarãre masicũ iirare were gojabeogu iiaa. Mari Pagũ Goãmũpũ irire weredoregu apipũ Jesucristore. ĩgu yarãre ĩgu pohro majarãre masicũ iidoregu apipũ. Eropigu pũhrũ waburire marire masicũ iidoregu apipũ Jesucristore. Eropigu Jesucristo marire eropa masicũ iibu ĩgu anyure obeodigu árĩmi yũre Ñure irire weredoregu.

² Eropigu yũhũ Ñu baja ĩamũhtabũ Goãmũ ĩgu dohpa iiburire. Goãmũ ĩgu wereniguiiri sãre peeabũ. Eropigu árĩpehreri yũ ĩarare yũ peerare were gojabeogu iiaa. Jesucristo ĩgu basi ta diaye arĩrare were gojabeogu iiaa.

³ Ipũ mera pũhrũgue dohpa waburire were gojagu iiaa. Merogã duhyaro iiaa iri árĩpehrero eropa waboro. Eropirã árĩpehrerã ipũre buherã, yũ wererire õaro yũhrirã õaro mucubirirã árĩrãcoma.

Siete iglesia majarãre Jesu yarã gamenererãre gojabeopũ Ñu

⁴ Yũhũ Ñu mũare siete cururi majarãre Jesu yarãre Asia yeba majarãre gojabeoa. Goãmũ ĩgu mahiri mera mũare õadorea. Eropirã ĩgu itamuri mera õaro árĩque mũa. ĩgu negohraguere eropa árĩniguidigu árĩñumi. Dohpague

săre eropa ta árĩniguimi. Pũhrugue sãre eropa ta árĩniguigucumi. Goãmu ĩgu opu doaró core Espĩritu Santo ãhrimi. Siete suburi maja turari árĩpehreri opagu ãhrimi. ĩgu mera sãre yu mũare ãadoreá daja.

⁵ Cristo ĩgu mahiri mera mũare ãadoreá daja. ĩgu Cristo Goãmu yare guýaro mariro weregu ãhrimi. Eropigu ĩgu sĩridigu ĩgu masa mũriadigu ne dipaturi sĩrisome ĩgu. ĩgu yarã waborore masa mũriamũhtadigu ãhrimi. Eropigu i yeba majarã árĩpehrerã oparã tauro opu ãhrimi ĩgu. Marire mahigu ĩgu di cóãra mera mari ñeri iirare cóãdi árĩmi ĩgu.

⁶ Eropa cóãgu marire oparã wamorãre wacũ iidigu árĩmi ĩgu. Eropigu marire pahia masare Goãmure serẽbasarã wamorã sãre wacũ iidigu árĩmi. Eropigu Goãmu mari Pagu yare iimorãre wacũ iidigu árĩmi ĩgu eropa sĩrigu. ĩgu eropa iidigure ãaro werenigui umupeoro gahmea árĩpehrerinuri. Árĩpehrerã tauro opu eropa árĩniguimi ĩgu. Eropa ta árĩporo.

⁷ Õaro pee masi coreque mũa. Imica cururi weca dijarigucumi Cristo. ĩgu eropa aricũ ĩarãcoma árĩpehrerã. ĩgure crusague pabia wejẽnirã mũra sã ĩarãcoma. Eropirã ĩgu aricũ ĩarã i yeba majarã árĩpehreri cururi majarã orerãcoma gũirã. Eropa ta árĩporo.

⁸ Õpa arĩmi mari Opu Goãmu: “Yũhu árĩpehrerire ĩhacũnugudigu ãhraa. Eropigu árĩpehrerire pehrecũ iibu ãhraa, arĩmi. Iribojegue sãre eropa árĩniguimuribu. Dohpague

sāre eropa āhraa. Puhrugue sāre árĩgura,” arĩmi Goām̃u.

Jesucristore gosesirigure yu ĩhabu, arĩ werepu
Ñu

⁹ Yuh̃u Ñu mua acaweregu Jesu yagu āhraa. Eropigu mua iro dopa ta yu sã Jesu ya árĩburire yu iira dipuwaja ñero taribu. Eropigu mua iro dopa ta yure erã ñero iiquerecũ ĩgu ita-muri mera Jesure cóãbiribu. Mari yujuro mera ĩgu Op̃u árĩro majarã árĩmorã āhraa. Yaha yeba majarã erã cóãdigu árĩgu Patmo waĩcari nũgurogue āhraa. Goām̃u yare Jesucristo ĩgu werera sāre gajirãre yu wereri dipuwaja õgue erã cóãbeodigu āhraa.

¹⁰ Ohõ yujuñu sooriñu árĩcũ Espíritu Santo yure quẽroque ĩhmuami. ĩgu eropa ĩhmucũ yu purupuru burigã wereniguiri busuro dopa carabu. Corneta turaro busuro dopa eropa ta busuro carabu ĩgu wereniguicũ.

¹¹ Ōpa arĩgu carami yu peecũ:

—Yuh̃u árĩpehrerire ĩhacũnugudigu āhraa. Eropigu yuh̃u árĩpehrerire pehrecũ iibu āhraa. Dohpague m̃u ĩaburire gojaripũgue goja aĩque. M̃u eropa goja aĩra puhru siete cururi majarãre Goām̃u yarãre obeoque iripũre. Erã siete cururi majarã Asia yeba árĩri macari majarã āhrima. Eropigu Efeso majarãre, Esmirna majarãre, Pérgamo majarãre, Tiatira majarãre, Sardis majarãre, Filadelfia majarãre, Laodicea majarãre m̃u ĩaburire gojabeoque, arĩgu carami yure.

12 Īḡu eroparīcũ peegũ majinũgajabũ yũre wereniguigure ĩabu. Eropa majinũgajagũ siete sihãgori yucũre erã duhpeora yucũre oro mera erã iira yucũre ĩhabũ.

13 Iri yucũ watope masũ iro dopa bejagũre ĩhabũ yũhũ. Īḡu yoari suhriro sañagũ āhrami. Īḡu guburigue dijimerejabũ ĩḡu suhriro. Eropigũ oro mera erã iira gasiro mera ĩḡu coretihbire tũãdiudigũ āhrami.

14 Eropiro ĩḡu poari yaji poari iro dopa boreabũ. Īḡu cuiiri peame porã iro dopa goseabũ.

15 Īḡu guburi bronce waĩcũri come timura come iro dopa goesiriabũ. Eropiro ĩḡu wereniguiri baja ʉtã dipabu iro dopa bũsũro carabũ.

16 Īḡu mojoto diaye maja mojotopũ siete necã opãmi. Eropiro ĩḡu disirore ñoserimiji pepũri usirimiji cuñuami. Eropiro abe ʉmũ majagũ ĩḡu cuimijuro dopa ĩḡu diapo turaro goesiriami.

17 Eropigũ ĩḡure ĩagũ ʉca waha ĩḡu guburi pohro mehmerejabũ sĩrigũ iro dopa. Yũ eropa mehmerejacũ ĩagũ ĩḡu, ĩḡu mojoto diayepũ mera yũre duhpeo õpa arãmi:

—ʉcabita. Yũ árĩpehrerire ĩhacũnugudigũ āhraa. Eropigũ árĩpehrerire pehrecũ iibu āhraa.

18 Ojocariniguigũ āhraa yũhũ. Sĩridigũ árĩribũ. Dohpaguere ĩaque. Árĩpehrerinũri eropa ojocariniguicãa yũhũ. Sĩridi dipaturi masagũ dipaturi masare sĩribiricũ iimasia yũhũ. Eropigũ masare peamegue wabiricũ iigũ āhraa yũhũ.

19 Eropigu dohpague mu ĩarare gojaque. Puhrugue eropa waboro sãre ĩagu gojaque.

20 Oã siete necãre yu mojoto diayepu oparãre weregura mure. Eropigu siete sihãgori yucure erã duhpeora yucu oro yucu sãre weregura. Yu òpa arĩ wererire iribojegue majarãre ne werebirimuribu. Òpa ãhraa iri: Siete necã siete cururi majarã yaharã oparã árĩrã iro dopa ãhrima. Eropiro siete sihãgori yucure erã duhpeora yucu siete cururi majarã yaharã iro dopa ãhrima, arãmi yure Jesucristo.

2

Efeso majarãre Jesu yarãre go-janugadoreñumi Ñure

1 Eropa arĩtuhaja òpa arĩnemoami yure go-jadoregu:

—Efeso majarã yaharãre, erã opu sãre òpa yu arĩrire arĩ gojabeoque mahu. Yuhu mojoto diayepu siete necãre opagu ãhraa. Eropigu siete sihãgori yucu watope curigu ãhraa. Eropa curigu árĩgu muare òpa arĩ werea:

2 Árĩpehreri mua iirare masipehoa. Yaha árĩburire turaro mohmeabu mua. Yure mua umupeo duhubirabu. Ñerire iirãre mua ĩadiabirabu. Eropirã “Jesu buhedoregu ĩgu ap-inirã ãhraa,” arĩmaacãnirãre queoro erã buhe-biricũ ĩarã, guyarã erã árĩcũ masiabu mua.

3 Yahare mua iira dipuwaja mua ñero tari-quererã erã guyarãre tarinugabu mua. Eropirã yure ne duhubirabu mua. “Irire gariborea waca pare,” arĩbirabu mua.

⁴ Eropa mua òarã árĩquererã ta yujuñere òaro iibeaa mua. I ãhraa iri: Yure òaro mua mahimuhtadiro dopa dohpaguere iibeaa mua.

⁵ Yure mua umupeomũhtarare guñaque mũraro ta daja. Dohpaguere mua yure umupeobiriqueyarire guñaque. Eropirã mua irire mua ñeri iirare bujawereque. Irire duhuque. Eropa duhurã yahare mua iimuhtadiro dopa ta iique daja. Mua ñeri iirare mua duhubiricũ ãagũ, yujugũ mua yagure sihãgodigũre aĩ cóãgũra. Eropa iigũ mua yuju curu majarãre cóãgũra. Mua ñeri iirare duhubiricũ mua yaha curu majarã árĩnirãre duhupehrecũ iigũra.

⁶ Yure umupeobiriqueyarã árĩquererã ta ire òaro iiabũ mua: Nicolaita yare buherãre ñerãre ãdiabeaa mua. Yũ sã erãre ãdiabeaa.

⁷ Gamiricũrã ãhraa mua. Eropirã peeque. Mũare yaha curu majarãre Espĩritu Santo ãgũ wererare peeque mua sã. Òpa arĩmi ãgũ: “Árĩpehrerã Jesure umupeo duhubirãre Goãmũ ya pohe majagũ dũcare paraíso majagũ dũcare badoregũra. Irigũ dũca ojocaririre odigũ ãhraa,” arĩmi Espĩritu Santo, arĩ were gojabeoque Efeso majarã yaharãre erã opũ sãre, arãmi yure Jesucristo.

Esmirna majarãre Jesu yarãre go-jabeodoreñumi Ñure

⁸ —Esmirna majarã yaharãre erã opũ sãre òpa yũ arĩrĩre gojabeoque mũhũ, arãmi yure Jesucristo. Yũhũ árĩpehrerire ãhacũnugudigũ ãhraa. Eropigũ árĩpehreri pehrecũ iibu ãhraa.

Sîria wabũ. Dipaturi ojocaria daja. Eropigu õpa arĩ werea muare:

⁹ Mua ñero tarirare masia. Mojomorocurã mua árĩcũ sãre masia. Eropa mojomorocurã árĩquererã ta ñgu wereniguirire peerã Goãmu yare õarire wuaro opaa mua. Gajirãpu muare ñhaturirã muare erã ñero quere moarare masia. Erã “Gua judio masa Goãmu yarã ãhraa,” arĩquererã guyarã iima. Erã Satanare umupeorã ãhrima.

¹⁰ Dohpaguere mua ñero tariburire güibiricãque. Peeque mua. Watĩ muare Goãmure duhudoregu yujurãyeri mua mera majarãre peresu iidoregucumi. Diez nuri gohra ñero tarirãca mua. Erã eropa ñero iicũ muare erã wejẽdiaquerecũ ta yure yaha sãre ne cóãbiricãque. Mua yure eropa cóãbiricũ ñagu árĩpehrerinuri muare õaro árĩcũ iigura.

¹¹ Gamiricurã ãhraa mua. Eropirã peeque. Muare yaha curu majarãre Espíritu Santo ñgu wererare peeque mua. Õpa arĩmi ñgu: “Árĩpehrerã Jesure umupeo duhubirã peameguere wasome,” arĩmi Espíritu Santo, arĩ gojabeoque Esmirna majarã yaharãre erã opu sãre, arãmi Jesucristo yure.

Pérgamo majarãre Jesu yarãre gojabeodoreñumi Ñure

¹² —Pérgamo majarã yaharã erã opu sãre õpa yu arĩrire gojabeoque muhu, arãmi yure Jesucristo. Yuhu ñoserimijire pepuri usirimijire opagu ãhraa. Muare õpa arĩ weregura:

13 Mũa ářĩrore masia. Eroque mũa ya maca majarã opu Satana áhřimi. Erã Satanare umu-peoquerecũ mũapu yũre umupeoa. Erã mũa mera majagu mũrũre Antipa mũrũre yahare ôaro weredigu mũrũre wejẽma. Ĩgũre erã wejẽcũ ĩaquererã ta yũre ne umupeo duhubirabu mũa.

14 Mũa eropa umupeo duhubiriquererã merogã yũre tarinũgabũ mũa. Yujurãyeri mũa mera majarã Balaam ya buherire gahmema. Iribojegue majagu ĩgu Balaam waĩcũgu ôpa arĩmũriĩnumi Israe masare ĩhaturirã erã opũre: “Israe masare tarinũgadiagu ôpa iique. Goãmarã wėanirãre mũa orare barire badoreque erãre. Eropigu nome mera ñero iicũ iique erãre,” arĩ weremũriĩnumi Balaam gajirã opũre Balaco waĩcũgũre. Iribojegue ĩgu eropa ñero iidoređiro dopa ta dohpague sãre ñero iicũ iima yujurãyeri mũa mera majarãre.

15 Eropirã erã iro dopa ta gajirã mũa mera majarã Nicolaita buherire gahmema. Iri buheri sãre ĩadiabeaa yũhũ.

16 Eropirã mũa iri ñeri iirire duhuque mũa. Mũa eropa duhubiricũ ĩagu yojaro mera mũa pohroque wagũ, eropa ñero iirã mera gamequeãgũca. Yũhũ disiroque cuĩurimiji ñoserimiji mera gamequeãgũca erã mera.

17 Gamiricũrã áhřaa mũa. Eropirã mũa ya curu majarãre yaharãre Espĩritu Santo ĩgu wererare peeque mũa. Ôpa arĩmi ĩgu: “Ářĩpehrerã Jesure umupeo duhubirãre mana waĩcũri barire umaro maja barire ogũra. Utã boreriyeri sãre ogũra erãre. Iri utãyeri mama waĩre yũ gojat-

urayeri áríroca. Gajirã iri waĩre ne masisome. Iri utãyerire aĩrã dihta iri waĩre masirãcoma,” arĩmi Espíritu Santo, arĩ gojabeoque Pérgamo majarãre erã opu sãre, arãmi yure Jesucristo.

Tiatira majarã sãre Jesu yarãre gojabeodoreñumi Ñure

¹⁸ —Tiatira majarã yaharã erã opu sãre òpa yu arĩrire gojabeoque mũhũ, arãmi daja yure Jesucristo. Yũhũ Goãmũ magũ yu cuiiri peame porã iro dopa gosesirigũ ãhraa. Eropiro yu guburi bronce waĩcũri come erã timura iro dopa gosesiria. Mũare òpa arĩ werea:

¹⁹ Mũa iirare masia yũhũ. Goãmũre masa sãre mũa umupeorare, yure mũa cóãbirirare, gajirãre mũa itamurare, ñero tariquererã mũa yure duhubirirare masia. Negohraguere mũa iidiro tauro dohpaguepure òaro iinemorã iiaa mũa. Iri sãre masia yũhũ.

²⁰ Mũa eropa òaro iirã árĩquererã ta òpa yure tarinũgabũ mũa: Jezabe waĩcũgo “Goãmũ yare werego ãhraa,” arĩ gũyago mũa watope ta ãhrimo. Mũare igo ñero buhecũ peerã igore turibirabũ mũa. Eropa gũya buhego yaharãre yu pohro majarãre nome mera ñero iicũ iimo. Eropigo goãmarã wéanirãre erã orare barire badoremo igo yaharãre.

²¹ Igo ñerire igo bũjawereborore coreniribũ. Yũ eropa corequerecũ igo ñero iirire duhudia-biramo.

²² Eropirã yure peeque mũa. Igo dorecũcũ iigura. Igo mera ñero iinirã sãre dorecũcũ iigura. Eropirã erã burigã ñero tarirãcoma.

Eropa ta iiguca eräre igo mera erã ñero iirare erã bujawerebircũ, irire erã duhubircũ.

²³ Eropigu igo poräre wejẽgura. Yũ eropa iicũ ãarã árĩpehrerã yaharã yũ õaro masirire masirãcoma. Masa erã pepiri sãre erã uaribejari sãre masia. Yũ eropa masicũ masirãcoma erã igore yũ eropa dipuwaja moacũ. Árĩpehrerã mua ñerire iira dipuwaja, dipuwaja moagura muare. Eropigu mua õarire iira wajapure õaro iigura muare.

²⁴ Mua Tiatira majarã gajirã mua mera majarã igo ya buherire gamebirabu. Muapu Satana ya buherire “Wuaro igu masiri ãhraa,” erã arĩrare gamebirabu mua. Eropigu muapure gajino mua iiburire dorenemosome yũhũ.

²⁵ Dorenemobiriqueregu iñe dihtare dorea muare: Mua pohrogue yũ dujariboro core yũ buherire mua masirare ne merogã mera cãdijibircãque.

²⁶⁻²⁷ Árĩpehrerã ñerire tarinuganirãre, yũ gamerire eropa iiniguirãre oparã árĩmorãre acugura. Yũ Pagu igu yure opu acudiro dopa ta muare oparã acugura yũ sã. Árĩpehreri yeba majarã tauro árĩrã oparã árĩmorã acugura muare. Eropa oparã ñajarã, mua doca árĩrãre árĩpehreri yeba majarãre turaro dorerãca. Eropa turaro dorerã muare tarinuganirã mata pehrea wacũ iirãca mua eräre.

²⁸ Eropigu muare yahare ne duhubirininirãre boyomuriridirure ogura. Eropigu mua mera árĩguca yũhũ.

²⁹ Gamiricurã ãhraa mua. Eropirã mua

ya curu majarãre yaharãre Espíritu Santo ïgu wererare peeque mua, arĩ gojabeoque Tiatira majarãre, arãmi yure Jesucristo.

3

Sardis majarãre Jesu yarãre gojabeodoreñumi Ñure Jesucristo

¹ —Sardis majarã yaharãre erã oparã sãre òpa yu arĩrire gojabeoque muhu, arãmi daja yure Jesucristo. Yuhu ïgu Espíritu Santo siete suburi maja turarire opaa. Eropigu siete necãre opaa. Mũare òpa arĩ werea: Mua iirare masia. Òpa arĩ pepirima mũare gajirã: “Erã Goãmu yare òaro iipehorã àhrima,” arĩ pepirima mũare. Erã eropa arĩ pepiquerecũ, Goãmu yare òaro iibeaa muapu.

² Eropirã mua iirare òaro guñaque mua. Goãmu yare mua masirare òaro guñaque daja cãdijiro mariro. Goãmu ïgu ïacũ òaro iipehobirabu mua.

³ Eropirã yahare mua peemuhtarare mũaro ta òaro guñaque mua daja. Eropa guñarã yahare iique mua daja. Mua ñeri iirare duhuque. Yu arĩro dopa mua iibiricũ guñaña mariro mũare dipuwaja moagura. Yajari masu ïgu guñaña mariro ïgu yajagu ñajaro dopa ta mũare guñaña mariro dipuwaja moagu ariguca.

⁴ Yujurãyeri mua mera majarã Sardis majarã ñero erã iirire ïhacũbeama. Eropa òarã árĩrã, boreri suhriro sañarã yu mera curirãcoma.

⁵ Árĩpehrerã yahare duhubirã eropa ta boreri suhri sañarã árĩniguirãcoma. Eropirã yu mera

eropa árĩniguimorã erã waĩre yu gojaturipũgue erã sã erã waĩre gojatunirã árĩrãcoma. Erã erã waĩre yu gojaturare coesome yuhũ. Yu Pagu ĩgu ĩhabeorogue, anyua sã erã ĩhabeorogue, “Yaharã āhrima,” arĩ wereguca erãre.

⁶ Gamiricurã āhraa mua. Eropirã mua ya cururi majarãre yaharãre Espĩritu Santo ĩgu wererare peeque mua, arĩ gojabeoque Sardis majarãre yaharãre erã opu sãre, arãmi yure Jesucristo.

Filadelfia majarãre Jesu yarãre go-jabeodoreñumi Ñure

⁷ —Filadelfia majarã yaharã erã opu sãre ōpa yu arĩrire arĩ gojabeoque mũhũ, arãmi daja yure Jesucristo. Yuhũ ñeri marigu āhraa. Diaye maja weregu āhraa. Davi mũrũ iribojegue majagu opu masare ĩgu dorediri dopa ta turari mera doregura yu sã. Iri turari mera iidorecũ ne gajirã irire cãhmotamasibeamã. Yu iidorebircũ ne gajirã irire iimasibeamã.

⁸ Árĩpehreri mua iirire masia yuhũ. Guñaturabiriñarirã árĩquererã ta yaha buherire ōaro peeabũ mua. Yure waĩpeo duhubirabũ mua erã muare ñero iidiaquerecũ ta. Eropigu yahare iimorã apiabũ muare. Eropirã yu dorerire mua iicũ gajirã cãhmotamasibeamã muare.

⁹ Gajirã mua pohro árĩrã “Gua judio masa Goãmũ yarã āhraa,” arĩquererã ta guyarã āhrima. Goãmũ yarã árĩbeamã. Satanare umupeorã āhrima. Eropigu erãpure mua core mereja muare erã umupeocũ iigura erãre. Yu

eropiicũ ĩarã yu muare mahirire masirãcoma erã.

¹⁰ Muare yahare yu duhudorebircũ peerã õaro yuhriabu mua yure. Mua eropa iicũ ĩagu i yeba majarã árĩpehrerã erã ñero tariburisubu árĩcũ muare ĩhadibugura. Irisubu árĩpehrerã erã ñero tariburisubu árĩroca.

¹¹ Merogã duhyaa i yebague yu dujariboro. Yahare mua masirare cãdijibircãque. Eropirã yure eropa yuhriniguicãque mua wajataborore dedeori arĩrã.

¹² Eropigu yahare duhubirãre yu Pagu ya wihi majarã apigura erãre. Ĩgu ya wihi maja borari iro dopa árĩcũ apigura erãre. Eropirã Goãmu mera majarã eropa árĩniguirãcoma. Eropirã Goãmu yu Pagu yarã waĩcurã, ĩgu ya maca majarã waĩcurã sã árĩrãcoma. Ĩgu ya maca mama maca Jerusalén árĩroca. Iri maca umarogue Goãmu pohrogue dijariri maca árĩroca. Yu waĩ sãre mama waĩ opaguca. Iri waĩ sãre waĩcurãcoma yaharã.

¹³ Gamiricurã ãhraa mua. Eropirã mua ya cururi majarãre, yaharãre Espĩritu Santo ĩgu wererare peeque mua, arĩ gojabeoque Filadelfia majarãre yaharãre erã opu sãre, arãmi yure Jesucristo.

Laodicea majarãre Jesu yarãre gojabeodoreñumi Ñure Jesucristo

¹⁴ —Laodicea majarãre yaharã erã opu sãre õpa yu arĩrire gojabeoque mũhũ, arãmi daja yure Jesucristo. Yu arĩro dopa ta iigu ãhraa yũhũ. Eropigu guýaro mariro yu ĩarare eropa

wereniguigu āhraa. Árípehrerire mari Pagu ĩgu ĩhacũnugurare ĩbasagu āhraa yũhũ.

15 Árípehreri mua iirare masia yũhũ. Mua “Jesu yarā āhraa gua,” arĩquererā yũre merogā umupeoa. Yũre mua merogā umupeorā mua árĩcũ yũhũ gamebeaa muare. Mua “Jesure umupeobeaa gua,” arĩbeaa mua. “Jesure umupeorā āhraa gua,” arĩquererā ta yũre ōaro umupeobeaa. Mua yũre umupeodiaro dopa ta yũre wũaro umupeocũ ōaboaya.

16 Mua eropa yũre ōaro umupeobiricũ ĩagu muare gamebirigohracāgura.

17 Eropirā ōpa arĩ pepiraa mua: “Árípehrerire opaa. Ne gajino dũhyabeaa guare,” arĩ pepiraa mua. Eropa arĩquererā mojomorocurā iro dopa ta āhraa mua yũ ĩacũ. Dũhyataria muare. Eropirā ne moonijarā, suhri marirā, cuiri ĩhajabirā iro dopa āhraa mua yũ ĩacũ. Muare dũhyarire masibeaa mua.

18 Mua eropa masibirā árĩcũ ĩagu ōpa arĩ weregura muare: Muare dũhyarire masique. Eropirā yũre serēque. Oro gohrare mua asũro dopa ta ōarire yũ oparire yũpũre aĩque mua. Muare yũre ōaro umupeocũ ĩigura. Eropirā diaye ta Goāmũ ya mera wũaro oparāca mua. Eropirā yũ sĩrira mera mua ñero iirare cóānirā árĩque mua. Eropirā suhri sañarā erā guhyasĩribiro dopa ta mua ñeri iirare cóānirā ōarire iimorā árĩrā guhyasĩrisome mua. Eropirā mua cuiri ococura pũhrũ ōaro muare deyoro dopa ta Goāmũ yare ōaro peeque mua ōaro masiboro dopa.

19 Árípehrerã yu mahirãre erã ñero iirare werea. Eropigu yu mahirãre dipuwaja moaa gajisubu erãre itamubu. Eropirã yũpũre turaro gameque. Eropirã mua ñerire bujawere duhuque.

20 Peeque yũre. Mua wirire bihara wirire yu ejanugaja ñajadiabodiro dopa ta mua mera árídiagũ coregũ iiaa. Yu eropa árídiacũ peerã yũre mua mera árídoreque. Yaharã áríque. Mua eropa árídorecũ mua mera árígura. Eropigu mari sihu baro dopa ta mua mera õaro árígura. Eropirã yu mera õaro árírãca mua.

21 Ñerire yu tarinugara pũhrũ yu Pagũ opu ĩgu doarõ pohro doaa yu sã dorebu. Eropã ta mua sã ñerire mua tarinugara pũhrũ yu opu doarõ pohro doarãca doremorã. Muare yu pohro doacũ iigura.

22 Gamiricurã áhraa mua. Eropirã mua ya cururi majarãre yaharãre Espíritu Santo ĩgu wererare peeque mua, arĩ gojabeoque Laodicea majarãre yaharã erã opu sãre, arãmi Jesucristo yũre.

4

Umarogue Goãture erã mereja umupeorare ĩapu Ñu

1 Yũre ĩgu eropa arĩ werera pũhrũ umũsiguere pãgũra disiporore ĩhabũ. Dipaturi corneta turaro busũro watope turaro wereniguiri busũro carabũ yu peecũ. Ōpa arĩro carabũ yũre:

—Ōgue m̃uririque. I yu wereburi p̃uhr̃uguere waroca. Eropa waborore m̃are ĩhmug̃ura. Yu ar̃ĩdiro dopa ta eropa waroca, ar̃ĩro carabu ʔmarogue.

² Īgu eropa ar̃ĩ werecũ ta erogue m̃urijagu Esp̃ĩritu Santo ĩgu turari mera ĩagu ĩiabũ. Eropigu opu doarore ʔmarogue ĩhabũ. Ero yujugu doámi.

³ Eropigu ōaro gosesirigu doámi. Jaspe waĩc̃uri ʔt̃aye gosesiriro dopa ta, cornalina waĩc̃uri ʔt̃aye gosesiriro dopa ta ōaro gosesirigu doámi ĩgu. Eropigu ōaro gosesiriri bero esmeralda iro dopa gosesiriri bero pohecague doámi ĩgu.

⁴ Eropigu ĩgu doaro t̃urore yuju bero ĩhabũ oparã doari berorire. Veinticuatro gohra āhrabũ. Iri oparã doarire veinticuatro gohra Jesu yarã oparã doáma. Boreri suhricurã āhrama. Eropirã oparã erã peyari berorire oro berorire peyanirã āhrama erã.

⁵ Doariñe yu ĩam̃htarañegue miamaabũ. Eropiro gajiropa werenigui ri b̃us̃uro carabũ. Bupu sã b̃us̃ugu carami. Iri doaro core siete sih̃āgori yucu āhrabũ. Iri siete sih̃āgori yucu Esp̃ĩritu Santo ĩgu siete suburi maja turari opari iro dopa āhrabũ.

⁶ Eropiro ĩgu doaro core w̃uariya āhrabũ. Vidrio iro dopa ár̃ĩriya āhrabũ. Ōaro deco s̃uririya āhrabũ.

Īgu doaro pohro wapicurã gajiropa bejarã āhrama. Ojocarirã āhrama. Erã diaporire erã p̃ur̃up̃urire baja cuiricurã āhrama.

⁷ Yũ ãamũhtadigu gajiropa bejagu yee diagu iro dopa bejagu ãhrami. Ìgu pũhrũ árĩgu wecu iro dopa bejagu ãhrami. Erã pũhrũ árĩgu masu diapo iro dopa diapocũgu ãhrami. Erã Ƴrerã pũhrũ árĩgu gaa ìgu quẽ dupure sãegũ iro dopa ãhrami.

⁸ Erã wapicũrã nũcu seis quẽ dupuricũrã ãhrama. Eropiro erã quẽ dupuri pepurigue ta baja cuiricũri quẽ dupuri ãhrabũ. Eropirã umuri nũcu, ñamiri nũcu eropa bayaniguirã iiama. Ne baya duhubirama. Ōpa arĩ bayãma:

Ōagu, ōagu, ōagu Goãmu mari Opũ turatariagu ãhrimi. Ìgu iribojegue eropa ta árĩniguicãpũ. Dohpague sãre eropa ta árĩniguimi. Pũhrũgue sãre eropa árĩniguicãgucumi, arĩ bayaniguirã iiama.

⁹ Eropa bayarã erã wapicũrã gajiropa bejarã ìgu turarire bayarã iiama. Eropirã ìgure árĩpehrerinũri árĩniguigure “Ōhaa,” arĩrã umupeorã iiama.

¹⁰ Erã eropa baya umupeocũ ãarã veinticuatro Jesu yarã oparãpũ opũ doaro core mereja, ìgure umupeoama. Ìgu árĩpehrerinũri árĩniguigu ãhrimi. Eropa umupeorã erã oparã erã peyari berorire ìgu doaro core mehpeoama. Eropa mehpeorã ōpa arãma erã:

¹¹ Mũhu Goãmu gua opũ gohra ãhraa. Turagu ōagu ãhraa mũhu. Mũhu gua umupeogu árĩgu ta iiaa. Mũre eropa umupeoro gahmea guare. Árĩpehrerire ìhacũnugudigu ãhraa mũhu. Mũ gamediro dopa ta

iri árîpehrerire îhacûnuguyoro mûhû,
arâma erâ Goâmure ero doagure.

5

Gojarapû tûrara tûrure cordero sâre werepû

Ñu

¹ Pûhrû ero doadigû îgû mojoto diayepû îgû oparipûre gojarapûre îhabû. Iripû pepûri îgû gojarapû îgû tûrara tûru âhrabû. Eropîro siete suburi pihañari mera îgû pihañara tûru âhrabû.

² Eropigû turagû anyure îhabû. Îgû turaro werenigûiri mera ôpa arî wereami:

—I tûrure pihañarare ôagû dihta pãñamasimi. ¿Nihipû âhriri iripûre pãbu? arâmi îgû anyu.

³ Eropa arîqueregû ta iri tûrure pãñabure bocabiramî. Eropa ôagure bocabiramî. Ûmarogue i yebague ojocarirâ watope, sîrinirâ watope ne iri tûrure pãñabu maramî. Eropigû iri tûru majare buhebu maramî.

⁴ Eropigû iripûre pãñabodigure erâ bocabiricû îagû turaro oreabû yûpû.

⁵ Yû eropa orecû îagû yujugû erâ Jesu yarâ oparâ mera majagû ôpa arâmi yûre:

—Orebiricâque. Iri tûrure ñearire yujugû pãñamasimi. Îgû Juda ya curu majagû turagû âhrimi. Îgû opû Davi pãrami árîturiagû âhrimi. Watîre tarinûgadigû âhrimi îgû. Eropigû îgû iri tûrure siete ñearire pãmasigû âhrimi, arâmi îgû yûre.

⁶ Îgû eroparîcû peegû opû îgû doaró core Cordero îgû niguicû îhabû. Wapicûrâ gajiropa

bejarã, Jesu yarã oparã sã erã watope nigu-
iami ãgu Cordero. Ñgu eropa niguiqueregu
ñgu masa erã wejẽdigu mũru dopa dehyoami.
Siete cusaricũgu, siete cuiricũgu ãhrami. Iri
siete cuiri ñgu Espĩritu Santo ñgu siete suburi
maja turari ãhrabũ ñgu árĩpehrero ãhamasiburi.
Espĩritu Santo árĩpehrero i yebaguere Goãmu
ñgu obeodigu ãhrimi.

⁷ Eropigu Corderopũ opũ doarõ pohrogue
ejagu, erõ doagure ñgure ñgu diayepũ opara
tũrure tũaweã ãĩami.

⁸ Ñgu eropa tũaweã ãĩcũ ãarã wapicũrã
gajiropa bejarã, veinticuatro Jesu yarã oparã
sã Cordero core mereja ñgure umupeoama.
Erã Jesu yarã oparã árĩpehrerã arpa waĩcũri
buamũtẽrire opãma. Oropari sãre opãma.
Iripari incienso mũaturiripari dihta ãhrabũ. Iri
incienso Goãmu yarã ñgure erã serẽra ãhrabũ.

⁹⁻¹⁰ Eropa ñgure umupeorã õpa arĩ mama
bayarire bayãma erã Corderore:

Erã wejẽdigu mũhu ãhraa. Eropigu mũ
ya di mera masa ñeri iirare coeabũ
mũhu Goãmu yarã erã árĩboro dopa.
Eropigu masare árĩpehreri cururi
majarãre yujurãyerire, árĩpehrerã yare
wereniguirãre, árĩpehreri yeba majarãre
erã ñero iirare wajayebasabũ. Eropa
iigu erãre oparã árĩmorã, pahia masare
Goãmure serẽbasarã árĩmorã sã árĩcũ
iibabũ. Eropigu i yeba majarã weca oparã
árĩmorã acubũ mũhu guare. Eropa iigu
árĩdigũ iri tũrure ãĩ pãñamasibu ãhraa
mũhu, arĩ bayãma erã Corderore.

11 Yu ïagu daja bajaräre millones anyua majaräre ïhabũ. Opu doarore, wapicurã gajiropa bejaräre, veinticuatro Jesu yarã oparäre anyuapũ eräre gãhrisianugajáma. Erã anyua majarã turaro mera erã bayacũ ïhabũ.

12 Õpa arĩ turaro bayapeoama erã:
Cordero, muhu erã wejêdigũ árĩgu árĩpehreräre doremasibu, árĩpehrerire opamasibu ãhraa. Eropigu masipehogũ, turatariagu ãhraa muhu. Mu eropa árĩgu ãhraa masa erã ñerire erã iira dipuwaja erã wejêdigũ. Eropirã gua mure umupeorãca. “Õatariagu ãhrimi,” arĩrãca mure. Mure òaro wereniguirãca, arĩ bayáma anyua majarã.

13 Eropigu gajirã erã bayacũ peeabũ. Árĩpehrerã i yeba majarã, umaro majarã sã, ojocarirã, sĩrinirã, wũariya majarã sã, árĩpehrerogue árĩrã õpa arĩ bayarã carama:
Goãmure ïgu doarogue doagure, Cordero sãre òaro wereniguirãca. Muare umupeorãca. “Õatariarã ãhrima. Turatariarã ãhrima,” arĩrã árĩpehrerinũri eropa arĩniguicãrãca muare, arĩ bayapeorã carama.

14 Eropirã erã wapicurã gajiropa bejarã erã eropa arĩ bayacũ peerã “Eropa ta arĩ bayaporo,” arãma. Eropirã Jesu yarã oparãpũ mereja Goãmure, Cordero sãre umupeoama.

6

*Papera tũrure ïgu aĩra tũrure pihañarare
pãmi Cordero, arĩ werepũ Ñũ*

1 Puhru papera tūrure ĩgu aĩgāra tūrure Cordero pihañamũhtarañere pāmi. ĩgu eropa pācũ ĩhabũ. ĩgu eropa pāra puhru yujugu gajiropa bejarā mera majagu “ĩagu arique,” arāmi. Eropa arĩgu bupu busuro dopa ta wereniguiami.

2 ĩgu eropa arĩra puhru ĩhabũ yuhũ. Boregu cabayure ĩhabũ. ĩgu weca peyagu buiri berore opāmi. ĩgure opu peyari berore ohami gajigupu. ĩgu eropa ora puhru ĩgupu ĩgure ĩhaturirāre tarinugagu wahāmi.

3 Puhru yujuñe pihañarañere pātuhaja Cordero gajiñe pihañarañere pāmi daja. ĩgu eropa pāra puhru gajigu gajiropa bejarā mera majagu “ĩagu arique,” ĩgu arĩcũ peeabũ daja.

4 Eropigu gajigu cabayure diagure ĩhabũ daja. ĩgu weca peyagure turarire ohami gajigupu. I yeba majarāre erā basi gamewejēcũ ĩbure apiami ĩgure. Eropirā arĩpehrero majarā gamewejērācoma i yebague. Eropigu wuarimiji ñoserimijire ohami ĩgure.

5 Puhru peñere pātuhaja Cordero gajiñere pāmi daja. Eropigu gajigu gajiropa bejarā mera majagu ĩgu sã “ĩagu arique,” arĩcũ peeabũ daja. ĩgu eropa arĩra puhru cabayu ñigure ĩhabũ. ĩgu weca peyagu nũcũri queoriñere opāmi.

6 ĩgure yũ ĩara puhru gajiropa bejarā watope ōpa busuro carabũ:

—Trigo cebada sã pehrea waroca. Eropiro iri waja pagari arĩroca. Eropirā yujunũ mohmeri

waja mera trigore yuju kilo ta asūrācoma. Yujunu mohmeri waja mera cebada yerire uhre kilo ta asūrācoma. Bari moari uyupu, vino sã baja árĩcāniroca, arĩro carabu.

⁷ Puhru uhreñere pātuhaja Cordero gajiñere pãmi daja. Īgu eropa pãra puhru gajigu gajiroa bejarã mera majagu árĩtugu ĩgu sã “Īagu arique,” ĩgu arĩcũ peeabu daja.

⁸ Īgu eroparĩcũ peegu borewijigu cabayure ĩhabu. Īgu weca peyagu sĩririñe waĩcuami. Eropigu ĩgu puhru arigu peame waĩcuami. Eropigu erãre cabayua weca peyarãre turarire ohami corderopu. Wapicurã masa árĩcũ yujugu erã mera majagure wejẽdoreami. Eropa ta árĩpehrero i yebaguere yujurãyeri masare wejẽdoreami. Gamewejẽri mera, oaboari mera, dorecuri mera, waimurã nuguri majarã guarã mera, yujurãyeri masare erã wejẽburire apiami erã perãre.

⁹ Puhru wapicuriñere pātuhaja gajiñere pãmi daja Cordero. Īgu eropa pãcũ Goãmure umupeoburi mesa doca Jesu yarãre erã wejẽnirãre erã sĩporãrire ĩhabu. Goãmu yare erã werera dipuwaja, “Jesu yarã āhraa,” arĩ erã werera dipuwaja gajirã erã wejẽnirã āhrama.

¹⁰ Erã gaguiniguirã ōpa Goãmure erã arĩcũ peeabu:

—Muhu gua Opu ñeri marigu, guyaro mariro mu arĩro dopa ta iigu āhraa muhu. ¿Eropigu i yeba majarãre guare wejẽnirãre dohpãrĩcũ dipuwaja moagucuri muhu erãre? arĩ gaguiniguiama erã.

11 Eropigu eräre boreri suhri yoari suhrire ohami. Eräre eropa ogu ôpa arâmi eräre:

—Soonique dohpa. Gajirã mua acawererã Jesu yarã mua iidiro dopa ta dohpague sãre ôari buherire buhenirã iima masare. Muare wejêdiro dopa ta erã sãre erã wejêpehoboro duhyaa dohpa. Eropirã eräre árîpehrerãre erã wejêboro core merogã corenique mua, arâmi eräre.

12 Puhru cinco ñearire pãtuhaja Cordero gajiñe ñeariñere pãcũ ihabu daja. Iriñere igu pãcũ ta, turaro yeba ñohmeabu. Eropigu umu majagu abe ñigu guhyaro wahámi. Ñiriñe suhriro iro dopa ta bejagu igu guhyaro wahámi. Eropigu abe ñami majagu di iro dopa ta diagu guhyaro wahámi.

13 Eropirã necã yebague yuhridija waháma. Yucugu ducare miruñe weãburiboro dopa ta necã yuhridija waháma.

14 Eropiro umusi dederea wababu. Paperapũre mari tũrabeo dedeodiro dopa ta dederea wababu umusi. Eropiro árîpehreri utã yucu sã árîpehreri nũgũrori sã gajipugue ejanugaja waha wababu.

15 Eropa wacũ iarã i yeba majarã tauro oparã, utã yucu maja wiri poheca maja goberigue duhrirã waháma. Gajirã oparã, surara oparã, doberi oparã, turarã, árîpehrerã erã pohro majarã, erã pohro majarã árîbirã sã yujuro ta duhrirama.

16 Eropirã duhrirã utã yucure utã sãre ôpa arĩrama:

—Gua weca yuhridijari wejêcãque. Sihĩre

opure ïgu doaro doagure güitaria. Cordero guare ñero dipuwaja moagucumi.

¹⁷ Guare árïpehreräre turaro dipuwaja moaburinü árïtuhajaa. Eropirã ïgu dipuwaja moaborore ne bocatïusome gua. Eropa dipuwaja moari arïrã gua weca yuhridijari wejêcãque, arïrama utã yucure árïpehrerã.

7

*Israe masa diaporire Goãmü ïgu wãl
tuhaborore werepü Ñu*

¹ Pührü wapicürã anyuare ïhabü. Erã árïpehrerogue waháma. Yujugü nortepü wagu erogue arirañere miruñere aribiricü iiami. Gajigü surgue, gajigü abe müririrogue, gajigü abe ñajarogue waha ïgu iro dopa ta miruñere aribiricü iama erã sã. Eropiro i yebague, wüariyague sãre ne miruñe aribiricü iama. Ne yujugü yucugure miruñe weã ñohmecü iibirama.

² Eropigü gajigü anyure ïhabü daja. Abe müririrogue arigü iiami ïgu. Goãmü ojo-cariniguigü ïgu wãl aïturiñere sello waïcüriñere aïgãrigü iiami ïgu. Eropa aïgãrigü gajirã anyua wapicüräre ïgu gaguiniguiami. Erã anyuapü i yebare, wüariya sãre ñero wacü Goãmü ïgu iidorenirã ährama erã.

³ Eräre gaguinigü ôpa arãmi ihï anyu:

—Corenique. Goãmü pohro majaräre erã diaporire ïgu wãl aïturiñere tuhunimorã iiaa gua. Gua eropa tuhaboro core i yebare, wüariyare, yucü sãre ñero wacü iibiricãque müa dohpa, arãmi ïgu gajirã wapicürã anyuare.

⁴ Eropigu Goãmu ïgu waĩ mera erã diaporire erã tuhumorã “Oã nũcu ãhrima,” arĩ wereami yure yujugu. Israe masa doce cururi majarã ciento cuarenta y cuatro mil gohra masa erã tuhumorã árĩnorã.

⁵ Oã árĩnorã erã tuhumorã: Doce mil masa Judá pãramerã árĩturiarã erã tuhumorã árĩnorã. Doce mil masa Ruben pãramerã árĩturiarã árĩnorã erã tuhumorã. Gajirã doce mil masa Gad pãramerã árĩturiarã árĩnorã erã tuhumorã.

⁶ Gajirã Aser pãramerã árĩturiarã doce mil gohra, gajirã doce mil gohra Neftalĩ pãramerã árĩturiarã, gajirã doce mil Manase pãramerã árĩturiarã erã tuhumorã árĩnorã.

⁷ Gajirã doce mil masa Simeo pãramerã árĩturiarã, gajirã doce mil masa Levĩ pãramerã árĩturiarã, gajirã doce mil masa Isaca pãramerã árĩturiarã árĩnorã erã tuhumorã.

⁸ Gajirã doce mil masa Zabulon pãramerã árĩturiarã, gajirã doce mil masa Josẽ pãramerã árĩturiarã, gajirã doce mil masa Benjami pãramerã árĩturiarã, erã tuhumorã árĩnorã. Erã nũcu árĩpehrerã masa ciento cuarenta y cuatro mil gohra árĩnorã erã tuhumorã.

Bajarã boreri suhricurãre werepu Ñu

⁹ Pũru masa bajarãre ïhabũ. Árĩpehreri yeba majarãre, árĩpehreri cururi majarãre, árĩpehrerã yare wereniguirãre, árĩpehreri macari majarãre, yujurãyerire Cristo gamerã dihtare erã niguirãre ïhabũ. Opũ ïgu doaro pohro, Cordero core niguiama erã masa. Bajarã masa ãhrama. Eropirã erãre queorã bocatĩurã

mejeta áhrama. Boreri suhricurã áhrama erã. Eropirã mijipũrire opáma.

¹⁰ Eropirã erã árĩpehrerã õpa arĩ gaguiniguiama:

Goãmũ áhrimi marire taugũ. Ĩgũ, ĩgũ doaro doagũ áhrimi. Cordero sã marire taugũ áhrimi, arĩ gaguiniguiama erã.

¹¹ Eropirã árĩpehrerã anyua, Jesu yarã oparã, gajiropa bejarã mera Opũ ĩgũ doaro tũrore yuju bero niguiama. Eropa niguirã ĩgũ doaro core mereja, Goãmũre umupeoama.

¹² Õpa arĩ umupeoama erã:

Eropa ta áhraa. Goãmũ gua Opũre mũre õaro werenigua. Ôatariagũ áhraa mũhũ. Masipehogũ áhraa mũhũ. Mũre “Õhaa,” arãa. Mũre umupeoa. Turatariagũ áhraa mũhũ. Mũ turarĩ mera ĩgũ áhraa mũhũ. Mũre eropa arĩrã árĩpehrerinũri eropa mũre arĩniguirãca. Eropa ta iirã, arĩ umupeoama erã Goãmũre.

¹³ Eropigũ yujugũ Jesu yarã oparã mera majagũ yũre wereami:

—¿Oã boreri suhricurãre masiri mũhũ? ¿Erã aridĩrore masiri mũhũ? arĩ serẽpiami yũre.

¹⁴ Ĩgũ eroparĩcũ peegũ,

—Masibea, arĩ yũhriabũ yũpũ.

—¿Noa áhriri erã? arĩ serẽpiabũ ĩgũre.

Yũ eroparĩcũ peegũ õpa arãmi yũre:

—Oã ñetariaro taririnũri árĩcũ yujuro bojerã áhrima, arãmi ĩgũ yũre. Erã suhrire coewearo dopa ta Cordero ĩgũ di cóãra mera erã ñerire

coenirã ährima. Eropirã õari boreri suhricurã ährima.

¹⁵ Eropa ïgu coenirã árĩrã Goãmũ ïgu doar core ïgure eropa umupeoniguicãma. Ùmuri ñamiri nũcũ ïgure eropa umupeoniguicãma pahia Goãmũ wihigue erã iiro dopa ta. Eropigu erã mera eropa árĩniguigu erãre itamugucumi Goãmũ gajiropa wari arĩgu.

¹⁶ Eropirã ne dipaturi oaboasome erã. Eropirã ne ñemesibusome. Ne abe umũ majagu asiriñere pabusome erã. Turaro asiri erã ñero taricũ iisome.

¹⁷ Opũ doar core niguigu Cordero erãre ïhadibugucumi. Ovejare ïhadibugu iro dopa erãre ïhadibugucumi. Eropigu maurigã dipague ojocaricũ iiriyarigã dipague erãre muhta wahgãgucumi oveja ïhadibugu iiro dopa ta. Eropigu eropa mucubiricũ iigucumi erãre. Eropirã umarogue árĩrã ne dipaturi oresome erã, arãmi Jesu yarã oparã mera majagu yure.

8

Seis papera erã pihañarare pãtuhaja gajĩñere pãpehopũ Cordero

¹ Seis papera erã pihañarare pãtuhagu duhyarañere pãtuhami Cordero. ïgu eropa pãtuhacũ yuju hora deco umarogue ne ejarimaria wahabũ.

² Eropigu siete anyuare Goãmũ pohro nigu-irãre ïhabũ. Eropigu erãre siete cornetarire ohami gajigu.

³ Gajigu anyu oropari incienso dicuburipari opadigu Goãmure umupeori mesa pohrogue eja, niguiami. Ero ïgu niguicũ baja inciensore ïgure ohama. Árípehrerã Goãmũ yarã ïgure erã serẽra mera moreburi inciensore ohama. Eropigu oro mera iira mesague, Goãmũ ïgu doaró pohro áríri mesague iri incienso Goãmure soe mujuburi áhrabũ.

⁴ Eropigu anyu ïgu oparapari maja inciensore mesa weca pohsiri peo soeami. Ìgu eropa soera pũhrũ iri incienso maja imica Goãmũ yarã ïgure erã serẽra mera mũria wahabũ Goãmũ pohrogue.

⁵ Eropa wara pũhrũ ïgu anyu i mesa maja nitire iriparigue aĩ pohsátuhaja, yebague pohmehdijucãmi. Ìgu eropa pohmehdijucũ miãmi. Turaro bupu paãmi. Eropiro gajiroa busũmaa, yeba ñohmemaabũ.

Cornetarire werepũ Ñu

⁶ Pũhrũ siete anyua yujurãyeri erã cornetarire purimorã iiama.

⁷ Yujugu anyu ïgu yarure purimũhtami. Ìgu eropa puricũ decoyeri yũsariyeri peame mera, di mera moreriyeri yebague yurimerejabũ. Iriyeri yurimerejacũ ta yeba ũjũa wahabũ. Ipẽ ũjũabũ: I yeba deco ejaboro pohro gohra ũjũa wahabũ. Eropiro iripẽta yucũ sã taa yahsari sã ũjũa wahabũ.

⁸ Anyu yujugu ïgu eropa purimũhtara pũhrũ gajigu anyu ïgu yaru cornetare puriami daja. Ìgu eropa puricũ wũadigu utãgu iro dopa bejadigu ôaro ũjũaniguidigu wũariyaguere mihrua

dijabũ. Eropiro yeba ãjudiopẽ ta wuaria diya poya wahabũ.

⁹ Eropirã wuaria majarã wai sã deco mera ejarã gohra yujupũ majase majarã sãria wahãma. Eropiro iri nũcũ gasi ta dohori gasi miria wahabũ wuariyaguere.

¹⁰ Perã anyua erã purira pũhrũ gajigũ anyu sã ãgũ yaru cornetare puriami daja. ãgũ eropa puricũ wuadiru necãru, sihãdiru dopa ta bejadiru yebaguere yurimereja wahabũ. I yeba maja diarire mau diparire yujupũ majase majare yurimerejabũ necãru.

¹¹ Eropiro iri nũcũ mauri ta sũiriyari dujabũ. Eropa wacũ bajarã masa iri decore sũiri decore ihrinijarã sãria wahãma. Iriru necãru sũidiru waĩcũabũ.

¹² Urerã anyua erã purira pũhrũ gajigũ anyu sã ãgũ yaru cornetare puriami daja. ãgũ eropa puricũ abe umũ majagũ, ñami majagũ sã deco erabonirã gohra poya wahãma. Necã majarã sã deco erabonirã dipuru ta poya wahãma. Eropiro umũgue wapicũri horari gohra abe ne boyobirami. Ñami sãre wapicũri horari gohra abe ñami majagũ, necã sã ne boyobirama.

¹³ Pũhrũ ãhamemujuabũ daja. Umarogue gaa wuwahgãgũre ãhabũ. Eropigũ ãgũ gaguiniguicũ peeabũ. Ōpa arãmi ãgũ:

—Ñetariaa. Ñetariaa. Urerã anyua purinibeama dohpa. Erã purira pũhrũ ñetariaro waroca. Eropa wacũ i yeba árĩrã ñetariaro warãcoma, arĩ dijuami ãgũ.

9

¹ Puhru wapicurã anyua erã purira puhru gajigu anyu igu yaru cornetare puriamĩ daja. Igu eropa puricũ necãru iro dopa bejagu árĩgu anyu ɯmarogue árĩdigu yebague yuhridijaricũ ihabu. Eropigu igure peame gobe ɯhcãri gobe maja sawire ohami gajigu.

² Eropigu igu iri gobere pãgũcũ peame imica wiriabu. Wɯari peame imica iro dopa ta wɯaro imica wiriabu iri gobere. Eropiro iri imica mata abe ɯmu majagure, ɯmaro sãre dederea wacũ iiahu.

³ Eropirã iri imica pohecague árĩrã poreroa yebague wudijarama. Eropirã coreba erã burigã pũriro dopa ta erã burigã pũriama.

⁴ Eropigu taare, yucure, gaji taare ñero iidorebirami erãre. Masa dihtare ñero iidoreami erãre. Goãmu igu waĩ aĩturiñere erã diaporire tuhuya marirã dihtare ñero iidoreami erãre poreroare.

⁵ Eropa ñero iidorequeregu ta erãre wejẽdorebirami. Erãre wejẽdorebiriquiregu ta cinco aberi gohra masare burigã pũricũ iidoreami. Coreba toarã erã pũriro dopa ta pũricũ iirã ãhrama poreroa sã.

⁶ Irinurire erãre erã pũriro iicũ masa sĩridiarãcoma. Erã eropa sĩridiaquerecũ ta erãre sĩridoresome Goãmu.

⁷ Oã poreroapu cabayua iro dopa dehyoama. Surara cabayua erã come suhri cãhmotari suhri sãnirã dopa ta dehyoama erã poreroa. Erã dipu weca oparã erã peyari berori oro berori iro

dopa peyáma. Erã diapori masa diapori iro dopa bejáma.

⁸ Erã poari nome poari iro dopa ãhrabũ. Eropirã erã gũcũri yeea gũcũri iro dopa ãhrabũ.

⁹ Sĩporã cãhmotari gasiro come gasiro iro dopa cãhmotama erã coretihbire. Eropiro erã wũucũ bajarã cabayua omarã erã omaro dopa erã wũuri dũpuri bũsuabũ. Cabayua tũruri gasire tararã erã gamewejẽroque warã erã bũsũro dopa ta bũsuabũ poreroa wũuri dũpuri.

¹⁰ Eropirã coreba ĩgu pĩgurucũro dopa ta toadiru ĩgu oparo dopa ta ãhrabũ erã poreroa. Eropirã erã pore mera masare cinco aberi gohra pũricũ toáma.

¹¹ Eropirã erã opu ãhrami. Ɛhcãri gobe opu ãhrami erã opu. ĩgu anyu mũru ãhrami. Hebreo ya mera Abadón waĩcũami ĩgu. Griego ya mera Apolión waĩcũami. Apolión, mari ya mera arĩrã, “Ñero goroweogu” waĩcũgu iimi.

¹² Poreroa masare erã ñero pũricũ toara pũhrũ i ñero erã tarimũhtadiro pehrea wahabũ. Iri pũhrũ pesubu ñero tarinirãcoma daja masa.

¹³ Pũhrũ yuju mojtocũ majarã anyua erã purira pũhrũ gajigu anyu ĩgu yaru cornetare puriami daja. ĩgu eropa puricũ Goãmu core niguiri mesague oro mera iira mesague wereniguiri bũsũro carabũ. Iri mesa maja sari wapicũri sarogue wereniguiri bũsũro carabũ.

¹⁴ Eropa wereniguero cornetare purigure anyure õpa wereniguiri mera bũsũro carabũ:

—Wũariyague Eufrate waĩcũriyague peresu árĩnirãre anyuare wiuque. Erã wapicũrã anyua

ãhrima, arīro carabũ.

¹⁵ Eroparĩcũ peegu anyupũ erãre wapicũrãre wiuami bajarã masare wejẽmorãre. I bojorire, inũre, i horare queoro corerã iiama erã wiumorã wapicũrã anyua. Erã coreديو sihajaa. Eropirã wejẽnũgagãrirã iiama. Árĩpehrerã deco mera erabonirãre masare wejẽmorã ãhrama.

¹⁶ Eropigu erã anyua yarã surara, “Oã nũcũ ãhrima,” erã arĩcũ peeabũ. Erã cabayua weca peyarã ãhrama. Doscientos millones surara ãhrama.

¹⁷ Eropigu cabayua erã weca peyarã yũ ãanirã õpa dehyoama. Erã sĩporãrire cãhmotari suhri come suhri diari suhri, yahsari suhri, boreri suhri suhricũama. Eropirã cabayuapũ erã dipu yeea diarã iro dopa dehyoama. Erã disirogue peame, imica, azufre ũjũri imica sã wiriabũ.

¹⁸ Eropiro cabayua disiro wiriri mera masare wejẽabũ. Árĩpehrerã masa deco erabonirãre masa bajarãre wejẽama. Eropirã peame mera imica mera, azufre ũjũri imica mera bajarã masare wejẽama.

¹⁹ Erã cabayua erã disiro wiriri mera wejẽama. Eropirã erã pore mera sã wejẽama daja. Erã pore ojogorogue añaa dipu dopa bejabũ. Eropirã iri pore mera camicũcũ iiama erã masare.

²⁰ Bajarã masa erã wejẽ duhanirãpũ erã mera majarãre wejẽcũ ãaquererã erã ñeri iirare ne duhubirama. Watẽare umupeo duhubirama. Erã goãmarã wéanirãre umupeo duhubirama. Erã wéanirãpũ oro mera, plata mera, bronce mera, ũtã mera, yucũ mera erã wéanirã

ãhrama. Erã wéanirã ojocaribirama. Peebibrama. Ñohmebirama. Erã eropa árĩquerecũ ta erãre masa umupeoama.

²¹ Eropirã erã wejẽ dũhanirã gaji ñeri sãre ne bujawerebirama. Masare erã wejẽrare, erã nome mera erã ñero iirare, erã yajara sãre ne bujawere duhubirama erã.

10

Miri tũrugãre papera tũrugãre aĩgãrimi anyu

¹ Pũhrũ gajigũ turagũ anyu ɯmarogue dijaricũ ñhabũ. Imica curu watope ãhrami. Eropigũ buibugũda ñgũ dipuru weca peyabũ. Ñgũ diapo ɯmũ majagũ abe iro dopa gosesiriabũ. Ñgũ ñĩgari peame iro dopa goseabũ.

² Eropigũ miri tũrugãre papera tũrugãre ñgũ pãra tũrugãre opãmi ñgũ. Ñgũ guburu diayepũ maja guburu mera wũariyague cãhrapi niguiami. Ñgũ guburu copũ maja guburupũ yebague cãhrapi niguiami.

³ Eropa niguigũ yeea erã gaguiniguiro dopa ta ñgũ turaro gaguiniguiami. Ñgũ eropa gaguiniguiro pũhrũ siete bupua wereniguirã carirama.

⁴ Erã eropa wereniguicũ peegũ gojanugrabũ yũhũ. Yũ eropa gojanugacũ ta ɯmarogue yũre wereniguiro carabũ.

—Siete bupua erã arĩrare gajirãre werebita. Eropigũ irire goja aĩbita, arĩro carabũ yũre.

⁵ Ñgũ eropa arĩra pũhrũ wũariyague niguidigũ, yeba niguidigũ anyu ñgũ mojoto diayepũ mera sĩme mujuami ɯmarogue.

6 Eropa sîme mujugu Goâmũ eropa ojo-cariniguũ waĩ mera waĩpeoami. Ìgu Goâmũpũ árĩpehrerire, ʘmũsire, ʘmũsĩ majarãre, i yebare, i yeba árĩrãre, pagayarire, pagayari majarãre iigu âhrimi. Eropigu õpa arãmi anyu:

—Goâmũ mera diaye arĩgu iiaa. Iripêta corerãra.

7 Seis anyua erã corneta dipurure erã purira pũhrũ gajigu anyu ìgu puritucũ Goâmũ iribojegue ìgu “Õpa iigũra,” ìgu arĩdiro dopa ta iigũcumi. Iribojegue masare irire õaro werebiripũ. Pũhrũ ìgu pohro majarãre, ìgu yare weremũhtarãre õaro werepehopũ ìgu. Iri ìgu werepirare dohpaguere iigũcumi, arãmi anyu.

8 Ìgu eropa arĩra pũhrũ ʘmarogue yũre wereniguidiro dopa ta dipaturi wereniguigu carami daja. Õpa arĩgu carami yũre:

—Wũariyague niguigu yebague niguigu sihĩ anyu pohrogue waque. Eropa wagũ papera tũrugãre ìgu opari tũrugãre aĩque, arĩgu carami yũre.

9 Ìgu eroparĩcũ peegu anyu pohrogue wahabũ. Ìgũre papera tũrugãre yũ serêcũ peegu õpa arĩ yũhriami yũre:

—Aĩque. Eropigu i papera tũrugãre baque mũhũ. Mũ ne bacũ mome iro dopa õaro imisĩroca. Mũ parugue mũ acura pũhrũ sũia waroca, arãmi yũre.

10 Ìgu eroparĩcũ peegu iri tũrugãre anyure yũ aĩra pũhrũ bahabũ. Yũ ne bacũ mome iro dopa imisĩabũ. Yũ ba acura pũhrũ yũ parugue sũiro carabũ yũre.

11 Yũ eropa bara pũhrũ õpa arãmi yũre:

—Dipaturi bajarã masare, macari majarãre, yebari majarãre, baja disirori wereniguirãre, erã tauro oparã sãre pũhrũ erã dohpa waborore wereyumũhtaque, arãmi yũre.

11

Perã Goãmũ yare weremorãre were gojapũ Nũ marire

¹ Pũhrũ yũre queodigure odoreami Goãmũ. Tuadigupẽ yoadigũ ãhrabũ irigũ. Irigure odoregũ õpa arãmi yũre:

—Yaha wihire queogũ waque. Iri wihi majañe yũre umupeori mesa sãre queoque. Eropigũ iri wihiguere masare yũre umupeorã sãre queoque.

² Disiporo wirinũgaropũre queobita. Iripũũ yũre gamebirã erã cũhrapirapũũ ãhraa. Erã cuarenta y dos aberi gohra Goãmũ ya macare iri maca majarã sãre ñero iirãcoma. Eropigũ queobita iripũũre.

³ Eropigũ yahare wererãre perãre obeogũra. Mil doscientos sesenta nũri gohra yahare wererãcoma. Co suhri sañanirã árĩrãcoma erã yũ weredorenirã, arĩ wereami yũre.

⁴ —I yeba majarã tauro opũ pohro pegũ olivo waĩcũri yucũ nigũa. Pegũ sihãgori yucũ sã iri yucũ pohro nigũa. Iri yucũ oã perã yahare weremorã iro dopa ãhraa, arĩ wereami daja yũre.

⁵ Eropirã erãre ñhaturirã erãre erã ñero iidiacũ erã disirogue pea porã wirimaaro soe wejẽpehocãroca erãre ñhaturirãre. Eropa ta erãre ñero iirãre wejẽrãcoma erã perã.

⁶ Eropiro erã perã erã deco aridorebircũ deco arisome. Eropiro yahare erã wereropẽ deco arisome. Eropirã maurire diyari poyacũ iirãcoma erã. Eropirã i yebare ñero wacũ iirãcoma erã. Árĩpehreri dohpa árĩrore, dohpa árĩrãre, masare ñero wacũ iirãcoma erã. Erã noho gamero iidiaropẽ eropa ñero wacũ iirãcoma i yebare.

⁷ Erã Goãmũ yare weretuhajacũ ãhcãri gobegue árĩgu ñegu nugu majagu wirigucumi. Eropigu Goãmũ yare wererã erã perã mera gamequeãgucumi. Eropa gamequeãgu tatarinugagu erãre wejẽcãgucumi.

⁸ Īgu eropa wejẽra pũhrũ erã ya dũpuri mura wũari maca maja mague oyaroca. Mari Opure Jesucristore erã pabia wejẽra maca ãhraa iri maca. Iri maca majarã ñerã árĩrã, Sodoma majarã mura, Egipto majarã mura iro dopa ãhrama.

⁹ Erã dũpuri mura oyaro ãhrenũ õaro oya, gajinũ deco erã ya dũpuri mura iri mare oyaroca. Eropirã árĩpehreri yeba majarã yujurãyeri, árĩpehreri cururi majarã yujurãyeri, árĩpehrerã yare wereniguirã yujurãyeri iri nũcũ nuri gohra erã ya dũpuri murare ãarãcoma. Eropirã iri nũcũ nuri gohra erãre yaadoresome.

¹⁰ Erã perã Goãmũ yare weremuhtanirã i yeba majarãre erã ñero iira dipuwaja moanirã árĩrãcoma. Eropirã erã eropa sirinirã árĩcũ ãarã árĩpehrero majarã mucubirirãcoma. Eropa mucubirirã bosenu ii, erã basi gajinore eropa ocãrãcoma.

¹¹ Erã eropa iiquerecũ ãhrenũ pũhrũ gajinũ

deco gohra Goãmũ eräre masugucumi daja. Īgu eropa masucũ erã dipaturi wahgãnugajarãcoma. Erã eropa wahgãnugajacũ iarã árĩpehrerã burigã güirãcoma eräre.

¹² Pũhrũ Ɂmarogue burigã eräre peräre wereniguicũ peerãcoma masa. Ōpa arĩri busuroca eräre:

—Ōgue muririque mua, arĩri busuroca.

Eräre eropa arĩ wereniguirire busucũ peerã imica cururi watope muria warãcoma. Eräre doonirã mura erã muriacũ iarãcoma.

¹³ Erã eropa muriarisubu yeba turaro ñohmeroca. Eropa ñohmecũ ta iri maca maja wiri baja wiri mihrua dija waroca. Eropirã yeba ñohmero mera siete mil masa sĩa warãcoma. Gajirã duhyarãpũ Ɂca wa, Goãmure Ɂmaro majagure “Turagu ãhrimi,” arĩ umupeorãcoma pare ĩgure.

¹⁴ I árĩpehreri eropa wara pũhrũ pesubu masa erã ñero tarituhajanirã árĩrãcoma. Eropa tarira pũhrugã ta dipaturi masa mata daja ñero tarirãcoma.

Seis corneta dipurure erã purira pũhrũ gajigũ puripũ

¹⁵ Pũhrũ seis corneta dipurure erã purira pũhrũ gajigũ anyu ĩgu yarure puriami. Īgu eropa puricũ Ɂmarogue turaro wereniguiro carabũ. Ōpa arĩro carabũ:

Dohpague mari Pagũ, Cristo mera i yeba majarã tauro opũ árĩgucumi. Eropigũ eropa opũ árĩniguigucumi Goãmũ, arĩro carabũ.

16 Eropirã Goãmũ core oparã doarigue doarã veinticuatro Jesu yarã oparã Goãmũ core mereja, ïgũre umupeqoama.

17 Eropa umupeqorã õpa arãma:

Gua opũ Goãmũ, turatariagu ãhraa mũhũ. Mũhũ negohraguere eropa árĩmũriyoro. Eropigu dohpague sãre eropa árĩniguia. Pũhrũgue árĩgũca mũhũ. Mũ turari mera masa erã opũ mũ árĩnũgacũ, “Õhaa,” arãa gũa mũre.

18 Árĩpehrerã i yeba majarã mũre gamebirã mũ mera guarima. Dohpaguere erãre mũ dipuwaja moaburisubu ãhraa. Sĩrinirã sãre mũ dipuwaja moaburisubu ãhraa. Eropiro mũ yarãpũre õarire erã iira wajare mũ oburinosubu ãhraa. Yujurãyeri erã mũ yare weremuhtanirã árĩma. Eropirã erã gajirã mũ yarã mera árĩpehrerã mũre õaro umupeonirã árĩma. Eropigu oparãre, bu árĩrã sãre mũ yarã erã árĩcũ ïha õaro ïigũca mũhũ erãre. Eropiro i yeba majarãre goroweocorerãre mũ cóãburisubuno árĩro ïiaa dohpaguere, arĩ umupeqoama Jesu yarã oparã Goãmũre.

19 Erã eropa arĩ umupeqora pũhrũ umaro maja wihi Goãmũ ya wihi ïgu pãgũra wihi ïhabũ. Eropirã iri wihi árĩri comorore ïhabũ gũa. Iri comoro pohecague Goãmũ “Masare itamugũra,” ïgu arĩ werepirapũ sañabũ. Gũa eropa ïacũ ta miamaa, bupu paamaa, gajiropa bũsũmaa, i yeba ñohmemaa wahabũ. Deco yũsariyeri deco bũrigã umarogue dijaribũ.

12

Nomeore, pĩru sãre werepũ Ñu

¹ Pũhrũ i yeba dohpa waborore ɯmarogue dehyoabũ yare. Eropa dehyoari gũhyadiaro maja āhrabũ. Ōpa ĩamũhtabũ: Ƴmarogue nomeore ĩhabũ. Igo suhriro abe ɯmũ majagũ iro dopa gosesiriabũ. Eropigo abe ñami majagũ weca niguiamo. Opũ ĩgũ peyarino berore doce necã opari berore peyadigo niguiamo.

² Eropiro igo porãcũboro merogã dũhyabũ. Eropigo igo niĵi wahgũgo pũriro mera gaguiniguiamo.

³ Pũhrũ dipaturi ĩhabũ daja ɯmarogue: Wũagũ pĩrure diagure ĩhabũ. Siete dipu dipucũgũ āhrami. Árĩpehreri ĩgũ dipu oparã erã peyarino berorire peyara dipu dihta āhrabũ. Eropigũ diez cusaricũgũ āhrami ĩgũ.

⁴ ĩgũ pĩguru mera necã dipurure wejēsiri medijuami. Árĩpehrerã necãre deco gohra wejēsiri medijuami. Eropigũ nomeo porãcũgo pohro niguiami pĩru. Igo magugã dehyoacũ babu iirami.

⁵ Merogã pũhrũgã ta masa dehyoatuhami majigũgã. Árĩpehreri yeba majarã opũ árĩbu āhrami ĩgũgã. ĩgũ eropa opũ turagũ árĩcũ masa ĩgũre tarinũgarã yujuro bojesome. ĩgũ eropa masa dehyoacũ ta Goãmũ ĩgũ doaro pohrogue ĩgũgãre aĩbeocãmi.

⁶ ĩgũ eropa iicũ nomeopũ masa marirogue pĩrure duhrigã wahámo. Goãmũ ĩgũ amuyudirogue duhrigã wahámo igo. Eroguere

mil doscientos sesenta nari gohra Goãmu igore ïhadibumi.

⁷ Eropirã ùmarogue gamewejênugáma. Migue waïcugu anyu ïgu yarã anyua sã pïru mera gamequeãma. Erã eropa gamequeãcũ pïru ïgu yarã anyua mera Miguere gamequeãmi.

⁸ Eropirã Migue sã pïrure tarinugáma. Eropigu pïrure ïgu yarãre anyuare ùmaroguere árĩnemodorebirami.

⁹ Eropigu wuagu pïrure cóãcãmi Goãmu. ïgu pïru watĩ ta árĩgu iiami. Satana waïcugu àhrimi. Iribojeguere ïgu pïru dupu dopa deyogu árĩñumi. Eropigu árĩpehreri yeba majarãre guyagu àhrimi. Goãmu ïgure cóãgu ïgu yarã anyua mera yebague cohã dijuami.

¹⁰ Pũhrũ ùmarogue turaro wereniguicũ peeabu:

—Dohpaguere mari Pagu masare taumi pare. Dohpague tamerare mari Pagu mari Opũ árĩgu àhrimi ïgu turarire ïhmubu. Eropigu ïgu obeodigu Cristo sã ïgu opu árĩrire ïgu turarire ïhmumi árĩpehrerãre. Watĩre ùmarogue árĩdigure cohã dijuami i yebague. Eropigu ïgu turarire ïhmumi mari Pagu. ïgu watĩpu ùmuri nucu, ñamiri nucu Jesu yarãre, “Oã ñerã àhrima,” arĩ weresãgu iimi mari Pagure. Eropigu mari acawererãre Jesu yarãre weresãgu árĩmi.

¹¹ Cristo Cordero waïcugu ïgu di cóãro mera mari acawererã ïgure umupeorã erã ñeri iirare cóãsũnirã árĩma. Eropa árĩrã watĩre tarinugáma. Eropirã õari buherire wererã, watĩre tarinugáma. ïgu yare werera dipuwaja

gajirã erãre wejẽdiaquerecũ ta, Cristo yare duhubirã árĩrã ãgure tarinũgama.

¹² Eropirã mũa ɯmaro majarã mucubirique. Watĩre ãgũ yebague cohã dijucũ ãarã mucubirique. Mũa yeba majarãpũ, wũariya majarã sã mojomorocurã warãca mũa. Mũa pohrogue dijami watĩ. ãgure dipuwaja moaboro merogã duhyaa. Eropigũ guataricãmi ãgũ. Mũa pohrogue ãgũ ejacũ mojomorocuro dujacũ iigucumi ãgũ mũare, arĩ gaguiniguiro caricũ peeabũ.

¹³ Eropigũ pĩrupũ cohã dijudigũ nomeore, majigugã pagore nũrusia wahgãmi.

¹⁴ Eropigũ Goãmũ gaa wũagu quẽ dupure ohami igore masa marirogue igo wũũ duhri wahgãboro dopa. Eroque igo ejara pũhrũ ɯhre bojori õaro gaji bojori deco gohra õaro ãhadibuami Goãmũ igore. ãgũ eropa ãhadibucũ pĩru igore ñero iimasibirami.

¹⁵ Ero igo árĩcũ ãagu pĩru igore miudiagu wũaro decore etocabeocãmi.

¹⁶ ãgũ eropa iiquerecũ yebapũ igore itamuabũ. Pĩru ãgũ disiro wiriri decore yebapũ yehrimaa wa uju aĩbeocãbũ.

¹⁷⁻¹⁸ Eropa wacũ ãagu pĩru guatariami. Eropa guagu yujurãyeri igo pãramerã árĩturiarã mera gamewejẽgũ wahãmi. Erãpũ Goãmũ dorerire iirã ãhrama. Jesu yare õari buherire ne duhubirã ãhrama. Erã mera gamewejẽgũ wahãmi. Eropigũ pĩru wũariya tũro pohro niguiami.

Perã nugu majarãre werepũ Ñu

¹ Wuariya turo niguigu, nugu majagu iriya árĩgure ĩgu wahgãpacũ ĩhabũ. ĩgu siete dipu, diez gohra cusaricũgu ãhrami. ĩgu cusari oparã erã peyarino berori peyámi. Eropiro ĩgu dipure ĩgu waĩre ĩgu gojatura ãhrabũ. ĩgu waĩ iri ñeri waĩ árĩro Goãmure ĩhaturiri waĩ ãhrabũ.

² Eropigu ĩgu nugu majagu yee dorogu guagu iro dopa bejámi. Eropigu bugu iro dopa guburicũgu ãhrami. Eropigu yee wuaguro iro dopa disirocũgu ãhrami. Eropigu pĩrupũ ĩgu turarire ohami nugu majagure. Eropa ogũ ĩgure ĩgu opũ doaro apigu ĩgu iro dopa ta masa bajarãre dorecũ ĩami pĩru nugu majagure.

³ ĩgu nugu majagu dipuru yuju dipuru camirocũri dipuru dopa bejabũ. Iri camiro ĩgure wejẽbocurira camiro árĩquerero yarira camiro ãhrabũ. Iri dipuru ojocaricũ ĩarã, uca waháma i yeba majarã árĩpehrerã. Eropa ĩha ucarã, nugu majagure “Turagu ãhrimi,” arĩ umupeoama. Eropirã ĩgu yarã waháma masa.

⁴ Eropirã nugu majagure pĩru ĩgu turarire ocũ ĩarã masapũ ĩgure pĩrure mereja umupeoama. Eropirã nugu majagu sãre mereja ĩgure umupeoama. Eropa umupeorã õpa arãma:

—Ne gajigu mũ iro dopa turagu marimi. Gajigu mũre ne tarinũgamasibeami, arĩ umupeoama masa nugu majagure.

⁵ Eropigu ĩgu nugu majagu “Turatariagu ãhrimi,” erã ĩgure arĩquerecũ ta, ĩgu Goãmure ñero wereniguiquerecũ ta eropa pepicãnimi Goãmupũ. Eropigu cuarenta y dos aberi gohra

ĩgu nugu majagu masare dorenigucumi. Iripêta
ĩgu opu árĩcũ gahmemi Goãmũ.

⁶ Eropigu Goãmure ñero wereniguiami ĩgu.
Ĩgu waĩre, ĩgu wihire, ɯmarogue ĩgu árĩro,
ĩgu pohro majarã sãre ñero wereniguiami nugu
majagu.

⁷ Eropigu Goãmũ yarãre gamewejẽgu erãre
tarinugámi. ĩgu eropa tarinugaquerecũ ta
eropa ĩacãniami Goãmũ. Goãmũ ĩgu eropa
iidorebircũre iisome ĩgu. Eropigu árĩpehrerã
i yeba majarã tauro opu árĩnirami nugu ma-
jagu. Árĩpehreri cururi majarã, árĩpehreri
yebari majarã tauro, árĩpehreri macari majarã
tauro, árĩpehrerã yare wereniguirã tauro opu
árĩnirami ĩgu.

⁸ Eropirã árĩpehrerã i yeba majarã ĩgu nugu
majagu pohro mereja ĩgure umupeorãcoma
Goãmũ yarã árĩbirãpũ. I yebare Goãmũ
ĩgu ĩhacũnuguboro core ĩgu yarã árĩmorãre
ĩgu mera árĩniguimorãre erã waĩre gojatu-
tuhãnumi. Iripũ ĩgu eropa gojaturapũ Cordero
erã wejẽdigu yapũ ãhraa. Iripũ erã waĩre
gojatubirã dihta Goãmũ yarã árĩbirã nugu ma-
jagure umupeorãcoma.

⁹ Gamiricurã ãhraa mũa. Eropirã peeque mũa
Jesu yarã árĩrã.

¹⁰ Árĩpehrerã mũare peresu iinirãre erã sãre
peresu iigucumi pũhrũ. Árĩpehrerã masare
ñose wejẽnirãre erã sãre ñose wejẽgucumi
pũhrũ. Irire masirã mari Goãmũ yarã ñero
tariquererã ta ĩgure cóãbircãrã. Eropirã yujuro
boje ĩgure guñaturarã.

11 Puhru gajigu nugu majagure ñhabu daja. Yeba pohecague ñgu árĩdigu ñgu wiriricũ ñhabu. Pecusaro oveja cusaro iro dopa bejari cusaro cusarocugu ãhrami. Eropa árĩqueregu pĩru iro dopa wereniguiami.

12 Eropigu nugu majagu árĩmũhtadigupu puhru árĩdigure opu acuami. Ñgu eropa opu acugupu árĩpehreri yeba majarãre árĩmũhtadire umupeodoreami. Árĩmũhtadi nugu majagu erã wejẽbocuridi camiro yaridigu ãhrami.

13 Eropigu puhru árĩdigu deyoro moarire ii ñhmuami masa erã ñha ucaboro dopa. Eropa ñgu masa erã ñaro peame wuuri peame umarogue dijaricũ iiami.

14 Eropigu árĩmũhtadigu ñgu ñhuro gajigu nugu majagupu deyoro moari mera masare guyãmi, “Ñhĩ mũa umupeobu ãhrimi,” arĩgu. Eropigu ñgu gajigu nugu majagu árĩmũhtadigure wéadoreami masare. Ñgu árĩmũhtadigu ñoserimiji mera erã ñosedigu árĩqueregu ta ojocarigu ãhrami. Ñgu iro dopa bejagure ta wéadoreami gajigu nugu majagu masare. Erã eropa ñicũ ñagu Goãmũ dooqueregu ta eropa ñacãniami.

15 Eropigu puhru árĩdigu nugu majagupu árĩmũhtadire wéadigure ojocaricũ iiami masare ñgu doreboro dopa. Eropigu wéadigupu erã ñgure umupeobirãre wejẽdoreami.

16 Eropigu árĩpehrerãre erã mojotori di-ayepu sãre ñgu waĩre gojatudoreami nugu majagu puhru árĩdigu. Erã mojotorire go-

jatubirininrãre erã diaporire gojatudoreami ãgu waĩre. Bu árĩrãre, oparãre, doberi oparãre, mojomorocurãre, erã pohro majarãre, erã pohro majarã árĩbirãre, árĩpehrerãre ãgu waĩre gojatudoreami.

¹⁷ ãgu árĩmũhtadigu nũgu majagu ãgu waĩre, ãgu numerore gojatubirãre ne asũdorebirami. Eropigu erãre duadorebirami.

¹⁸ Irire õaro masique mũa. Pee masirã árĩrã nũgu majagu ãgu numerore õaro ãha masique. Iri numero uma waĩ iro dopa ãhraa. Iri numero seiscentos sesenta y seis gohra ãhraa.

14

Goãmũ ãgu taunirã mama bayariĩne bayañorã

¹ Pũhrũ Siõn waĩcudigu utãgu weca niguigure Corderore ãhabũ. ãgu mera ciento cuarenta y cuatro mil masa ãhrama. Erã ãgu ya waĩre ãgu Pagũ ya waĩ sãre erã diaporire erã gojatunirã ãhrama.

² Erãre yũ ãacũ ta umarogue busũro carabũ. Wũari utãmu busũro dopa ta, bupu ãgu wũaro busũro dopa ta busũro carabũ. Eropigu arpa waĩcũrire erã buamutẽro dopa ta busũro carabũ.

³ Erã ciento cuarenta y cuatro mil masa bayarã ãhrama. Ero opu ãgu doarõ pohro wapicũrã gajiropa bejarã, Jesu yarã oparã sã core bayarã ãhrama erã. Erã bayariĩne mama bayariĩne ãhrabũ. Iri bayarire erã dihta masiama. Cristo ãgu taunirã dihta iri bayarire masiama. Erã i yeba árĩnirã mũra ãgu aĩ mujunirã ãhrama.

⁴ “Ne ñerire iisome,” arĩnirã ñerire iibirinirã ãhrama. Ne erã yujusubugã nome mera ñero iibirinirã ãhrama. Eropirã Corderore ãhacũnirã árĩrã, ãgu yare eropa ãniguimurama. Eropigu erãre ñerã watope árĩnirãre ãgu tau-morãre aĩami Goãmupũ. Eropa ãgu taunirã árĩrã, Goãmũ yarã árĩmorã, Cordero yarã sã árĩmuhtanirã ãhrama.

⁵ Eropirã erã mera majarã ne yujugu guyagu marami. Eropirã Goãmũ ãgu pepicũ ñeri iira dipuwaja marirã ãhrama erã.

Ererã anyua weremedijuñorã

⁶ Pũhrũ umarogue wũugũre anyure ãhabũ. ãgu i yeba majarãre árĩpehreri cururi majarãre, árĩpehrerã yare wereniguirãre, árĩpehreri yebari majarãre õari buherire werebu ãhrami. Iri buheri ne gohrotobea. Eropa árĩniguicã.

⁷ Eropigu anyu gaguinigu õpa arĩ medijuami:
—Goãmũre gũique. “Turatariagu, õatariagu ãhrimi,” arĩ umupeoque ãgure. Dohpaguere masare ãgu dipuwaja moaburisubu árĩro iiaa. ãgu umusire, yebare, pagayarire, mutayarigã sãre iidigu ãhrimi. Eropirã ãgure mereja umupeoque, arĩ gaguiniguĩ dijuami anyu.

⁸ ãgu eropa arĩra pũhrũ gajigu anyu umaro wũugũ õpa arĩ medijuami:

—Erãre cóãcãmi. Wũari maca Babilonia waĩcũri maca majarãre cóãcãmi Goãmũ. Erã ãgu cóãnirãpũ árĩpehrerã gajirãre ñero iicũ iima. Masa erãre ãhacũrã, ñerire uaribejarã, goãmarã wéanirãre umupeoma. Merericũrã vinore erã turaro uaribejaro dopa ta erã ñerire

turaro Ɂaribejama Babilonia majarãre Ɂhacũrã, arĩ were medijuami gajigu anyu.

⁹⁻¹⁰ Erã perã anyua eropa arĩra pũhrũ gajigu anyu erã pũhrũ wũũgu gaguinigiui ôpa arĩ medijuami Ɂgu sã:

—Árĩpehrerã nũgu majagure umupeorãre, Ɂgure wéadigure umupeorãre erã diaporire, erã mojotorire Ɂgu waĩre gojatunirãre dipuwaja moagũcumi Goãmũ. Erã mera guagũ erã tamerare turaro dipuwaja moagũcumi Goãmũ. Eropigu Goãmũ erãre bũrigã dipuwaja moaniguigũcumi cãdijiro mariro. Nũgu majagure umupeorã árĩpehrerã peamegue warãcoma. Eroque bũrigã pũriroca erãre. Azufre waĩcũri mera erã dihura peame árĩroca. Goãmũ yarã anyua, Cordero sã erã Ɂhuro ñero tarirãcoma erã.

¹¹ Iri peame eropa imicacũniguicãroca. Ne yarisome. Erãre eropa pũriniguicã iiroca. Árĩpehrerã nũgu majagure mereja umupeorãre eropa pũriniguicroca. Ʋmũri sãre, ñamiri sãre eropa pũriniguicãroca sooro mariro erãre. Ɂgu nũgu majagure Ɂgu wéadigure umupeorã, Ɂgu waĩre erã gojatunirã sã, eropa ta ñero tarirãcoma, arĩ medijuami anyu.

¹² Eropigu ôpa arĩ werea mũare ire: Mũa erã eropa ñero tariborore masirã, Goãmũ yarã Ɂgu dorerire iirã, Jesure cóãbirã árĩrã, Ɂgu yare duhubiricãque. Ñero tarirã árĩquererã ta Goãmũ yare duhubiricãque, arãa yũhũ mũare.

¹³ Pũhrũ Ɂmarogue yũre wereniguiro caracũ peeabũ daja. Ôpa arãmi yũre:

—Ire gojaque m̃h̃h̃. Goãm̃h̃ yarã ãgure cóãbirã árĩnirã dohpaguere m̃h̃h̃ s̃ĩrira p̃h̃r̃h̃ s̃ãre òaro mucubirirã árĩrãca m̃h̃h̃, arĩ medijug̃u carami ỹure. Ìg̃u eropa arĩra p̃h̃r̃h̃ Espĩritu Santop̃h̃ òpa arĩnemoami daja:

—Eropa ta ãhraa. Diaye ta ãhraa. Erã turaro erã mohmerire duhpiicã soorãcoma. Ûmarogue erã wac̃ òaro erã iirare guñag̃ucumi Goãm̃h̃. Eropig̃u erãre òaro iig̃ucumi. Eropirã erã mucubirirã árĩrãcoma, arĩnemoami Espĩritu Santo.

Pohe maja oterĩ d̃ucare mari beye aĩro dopa ta Goãm̃h̃ ãg̃u yarãre beye aĩg̃ucumi. Ñerãp̃ure boje beye dobog̃ucumi, arĩ gojañumi Ñu

¹⁴ P̃h̃r̃h̃ imica curu boreri curure ãhab̃h̃. Iri curu weca mas̃ dopa bejag̃u doãmi. Ìg̃u oro bero op̃h̃ ãg̃u peyarĩno berore peyãmi. Eropig̃u matamiji usiri mijire opãmi ãg̃u.

¹⁵ P̃h̃r̃h̃ gajig̃u anyu Goãm̃h̃ wihigue árĩdig̃u wirirami. Eropa wiririg̃u turaro gaguiniami imica curu weca doag̃ure:

—M̃h̃h̃ matamiji mera pohe maja d̃ucare i yeba maja d̃ucare tabe aĩpehocãque. Dohpaguere m̃h̃ queodiro ejaa. D̃uca boretuhab̃h̃, arãmi anyu.

¹⁶ Ìg̃u eroparĩc̃ peeg̃u ãg̃u matamiji mera i yebare tãrañgami ãg̃u imica curu weca doag̃u. Eropa tãrañgag̃u i yeba maja d̃ucare aĩro dopa iiami.

¹⁷ P̃h̃r̃h̃ gajig̃u anyu sã Goãm̃h̃ wihigue árĩdig̃u wirirami. Ìg̃u sã matamiji usirimijire opãmi.

18 Eropigu gajigu anyu Goãmure umupe-ori mesa pohrogue árĩdigu wirirami. Īgũpũ mesa maja peamere ĩhadibugũ āhrami. Eropa wiririgu matamiji usirimiji opagure gaguiniguiami:

—Mũhũ matamiji mera i yeba árĩri pohere, igui pohe maja dũcare aĩque. Iguipũ ñiituhabũ, arĩ gaguiniguiami.

19 Īgu eroparĩcũ peegũ anyu ĩgu matamiji mera i yebare tãragũ, iguitõrĩre wĩrita aĩami. Īgu eropa iira pũhrũ iritõrĩre iguitõrĩre ĩgu ñatĩarogue cõhãmi. Īgu eropa ñatĩaro dopa ta Goãmũ ĩgure gamebirãre turaro guagũ, dipuwaja moagũcumi.

20 Iri maca tũro pohro erã ñatĩaro iri iguitõrĩre ñatĩama. Ero erã ñatĩacũ igui deco wirĩro dopa di wiriabũ. Trescientos kilõmetros yoariya, yuju metro õaro gaji metro deco ũhcãriya āhrabũ di mera. Irĩre ĩha masiabũ. Yujunũ anyu Goãmure gamebirãre ñerĩre iinĩrãre gameneo erã ñeri iira dipuwaja moagũcumi. Īgu eropiicũ masa bajarã sĩrirãcoma. Eropa sĩrirã di pagari cóãrãcoma, arĩ masiabũ yũhũ.

15

Masa erã ñero tarĩborore anyua apituñorã masare

1 Pũhrũ ũmarogue gajiropa árĩrore ĩhabũ. Gũhyadiaro árĩro i yebague dohpa waborore ĩhmuriñe āhrabũ. Ōpa ĩhabũ: Siete anyua āhrama. Goãmũ guagũ siete suburi masare

dipuwaja moatubu iiami. Eropirã erã si-
ete anyuapũ dipuwaja moadore ĩgu apimorã
ãhrama.

² Anyuare yũ ĩara pũhrũ wũariyare õaro deco
suririya dopa árĩriyare ĩhabũ. Iriya peame
mera árĩriya ãhrabũ. Eropigũ iriya pohro
niguirãre nũgũ majagũre ĩgũre wéadigũ sãre
tarinũganirãre ĩhabũ. Erã nũgũ majagũ nu-
merore ĩgu ya waĩ maja numerore gojatudore-
birinirã ãhrama. Ero niguirã arpa waĩcũri
bũamutẽrire opáma. Iri bũamutẽri Goãmu ĩgu
ora ãhrabũ.

³ Eropirã Goãmu pohro majagũ Moise ya ba-
yarire bayarã iama. Cordero ya bayariĩe sãre
bayarã iama. Ōpa arĩ bayarãma:

Gua opu mũhũ Goãmu turatariagu ãhraa. Mũ
iirare ĩarã ĩha uca wahaa gua. Mũ iira
õataria. Mũhũ árĩpehreri yeba majarã
tauro opu ãhraa. Ōaro gũyaro mariro
diaye iiaa mũhũ.

⁴ Árĩpehrerã mure gũima. Árĩpehrerã mure
“Turagu ãhrimi,” arĩrãcoma. Mũ dihta ñeri
marigu ãhraa. Árĩpehrerã i yeba majarã mũ
pohrogue ejarã mereja mure umupeorãcoma.
Eropa ta iirãcoma erã árĩpehrerã õaro mũ iirare
ĩarã, arĩ bayarã iama erã.

⁵ Pũhrũ umarogue ĩhamemujugu, Goãmu ya
wihire pãgũra wihire ĩhabũ. Iri wihigue Goãmu
ĩgu doreri ĩgu gojara mijiri utã mijiri erã dibura
mijiri ãhrabũ.

⁶ Iri wihire yũ ĩacũ ta siete anyua iri wihi
pohecague árĩnirã wirirama. Erã Goãmu ĩgu

dipuwaja moadoregu ĩgu apimorã āhrama. Erã nũcu erã dipuwaja moaburire opáma erã anyua. Ōari suhri, boreri suhricurã āhrama. Eropiro erã coretihbi weca oro gasiro mera tuãdiunirã āhrama.

⁷ Iri wihigue árĩnirã erã wiriricũ wapicurã gajiropa bejarã mera majagu erãre siete anyuare oroparire ohami. Iripari Goãmu gua ĩgu dipuwaja moadoreburi mera ōaro ujuturiabu iripari. ĩgu Goãmu eropa árĩniguigu āhrimi.

⁸ ĩgu iriparire erãre ocũ ta Goãmu wihi pohecague ĩgu gosesiriri mera ĩgu turari mera imicacu sehya wahabu. Iri wihi eropa imicacu sehya wacũ iri wihire ne yujugu ñaja masiya marabu. Siete anyua Goãmu dipuwaja moadoregu ĩgu apidiro dopa ta erã masare dipuwaja moatura puhru dipaturi iri wihigue ñajamasirãcoma daja. ĩgu dipuwaja moaboro core ñaja masiya mara. apidiro dopa ta erã masare dipuwaja moatura puhru dipaturi iri wihigue ñajamasirãcoma daja. ĩgu dipuwaja moaboro core ñaja masiya mara.

16

Goãmu masare ĩgu dipuwaja moaborore werepu

¹ Puhru Goãmu wihigue turaro wereniguiro carabu. Siete anyuare weregu iigu carami:

—Goãmu ĩgure tarinuganirã mera guami. Eropirã ĩgu dipuwaja moadorerare iique. Eropirã dohpaguere siete pari dicarire yebague

pisiri medijurã waque i yeba majarãre, arĩ wereniguigũ carami.

² Eroparĩcũ peegũ árĩmũhtadigũ anyu ĩgũ oparipa dicũire yebague pisiri medijuami. ĩgũ eropa pisiri medijucũ nũgũ majagũ waĩre go-jatunirã ĩgũre wéadigũre umupeonirã ñero camicũama. Iri cami turaro pũriyoro erãre.

³ ĩgũ eropa pisirira pũhrũ gajigũ anyu daja ĩgũ oparipa dicũire pisiri medijuami daja wũariyague. ĩgũ eropa pisiricũ iriya diya wahabũ. Sĩridigũ di iro dopa āhrabũ iri di. Eropa wacũ iriya pohecague árĩnirã sĩripehrea waháma.

⁴ Perã eropa pisiri dijura pũhrũ gajigũ anyu ĩgũ oparipa dicũire pisiri medijuami daja maurigue, iri mauri diparigue sãre. ĩgũ eropa pisiricũ mauri diyari dihta wahabũ.

⁵ Eropa wacũ ĩagũ gajigũ anyu maurire coregũ òpa arĩgũ carami:

—Goãmũ, mũhũ ñeri marigũ āhraa. Doh-pague sãre eropa árĩniguicãgũ āhraa mũhũ. Iribojegue sãre eropa árĩniguicãmũribũ mũhũ. Eropigũ dipuwaja moagũ diyarire iigũ diaye iiabũ mũhũ.

⁶ Nũgũ majagũ yarãpũ mũ yarãre wejẽrã di cóãcũ iima. Mũ yare wererã sãre wejẽrã di cóãcũ iima erã. Erã eropa wejẽra dipuwaja iriyari diyari wahabũ erã ihriburi. Òpa ta mũ iicũ gahmeama erã, arĩgũ carami maurire coregũ anyu.

⁷ ĩgũ eropa arĩra pũhrũ Goãmũre umupeori mesague wereniguiro carabũ daja:

—Eropa ta āhraa. Goāmũ gua opu turatariagu āhraa mũhũ. Gũyaro mariro, queoro masare beye, dipuwaja moaa mũhũ, arĩ wereniguiro carabũ.

⁸ Ũrerã anyua erã pisirira pũhrũ gajigu anyu ĩgu oparipa dicũrire pisiri medijuami daja. Abe umũ majagu weca pisiri medijuami. ĩgu eropa pisiricũ abere masare turaro asicũ iiami Goāmũ.

⁹ Eropigu abe umũ majagu masare turaro asiami. Erãre eropa asicũ erã Goāmũ erãre ĩgu dipuwaja moadorecũ masirã, ĩgure ñero wereniguiama masa. Eropa ñero tariquererã ta erã ñero iirare ne bũjawerebirama. Eropirã duhubirama. Goãmure “Turagu āhrimi,” arĩ umupeodiabirama.

¹⁰ Wapicũrã anyua erã pisirira pũhrũ gajigu anyu daja ĩgu oparipa dicũrire pisiri medijuami daja. Nugu majagu ĩgu doarõ weca pisiri medijuami. Opu doarõ āhrabũ ĩgu doarõ. ĩgu eropa pisirira pũhrũ ĩgu yarã árĩri yebague naitĩaro wahabũ. Eropirã ĩgu yarã masa ñero pũricũ gũcũrire cũridihuama.

¹¹ Erãre ñero pũricũ ta, erã ñero camicũrã ta Goãmure umaro majagure ñero wereniguiama. Erã ñero iirapũre bũjawerebirama. Eropirã irire duhubirama.

¹² Yuju mojitocũ majarã anyua erã pisirira pũhrũ gajigu anyu daja ĩgu oparipa dicũrire pisiri medijuami daja. Eufrate waĩcũriya wũariyague pisiri medijuami. ĩgu eropa pisiricũ iriya bojomerea wahabũ. Abe mũririro majarã oparã erã gamewejẽrã warã erã iriya taribujari-boro dopa eropa iiami.

13 Puhru ɯrerã watẽare tarumurã iro dopa bejarãre ihabu. Yujugu tarubugu pĩru po-hecague árídigu ĩgu disirogue wirirami. Gajigu tarubugu watĩ nugu majagu disirogue wirirami. Gajigu tarubugu watĩ daja “Goãmu yare weregu āhraa,” arĩ guyadigu ya disirogue wirirami.

14 Eropirã erã ɯrerã watẽa tarumurã iro dopa bejarã deyro moarire ii ĩhmurã āhrama. Eropirã árĩpehrero majarã oparãre gamenerecũ iiama erã basi Goãmu mera gamewejẽdorerã. Erã eropa gamewejẽburinu Goãmu turatariagu árĩpehrerãre ĩgu dipuwaja moaburinu, pehreburiu árĩroca.

15 Ero coregue õpa arĩmi Jesu guare: ĩaque muu. Yajari masu ĩgu yajagu ariro dopa ta yu sã guñaña mariro ariguca. Yu ariborore õaro coredigu mucubirigu árĩgucumi. ĩgu yaha árĩburire iiniguidigu ñeri marigu mucubirigucumi. Yu mera árĩgucumi. Eropa iidigu árĩgu yu dujaricũ guhyasĩrisome ĩgu, arĩmi Jesu guare.

16 Eropirã ɯrerã watẽa i yeba majarã tauro oparãre gamewejẽcũ iituháma. Erã gamewejẽro Hebreo ya disiro mera Armagedón waĩcuu.

17 Seis anyua erã pisirira puhru daja gajigu anyu ĩgu oparipa dicurire imica cururi weca pisiri medijuami daja. ĩgu eropa pisirira puhru Goãmu wihigue ĩgu opu doarogue turaro wereniguiro carabu:

—Iripẽta árĩroca, arĩro carabu.

18 ĩgu eroparĩcũ ta miamaa, bupu pamaa, gajiropa busumaa, guhyaro yeba ñohmeabu.

I yeba masa erã árĩnũgara pũhrũ eropa siari ñohmehirabũ i yeba. Gajisubu ñohmediro tauro guhyaro yeba ñohmemaabũ.

¹⁹ Eropã ñohmecũ wũari macare Babilonia waĩcũri macare uhrema yehremaa wahabũ. Eropiro paga macari i yeba árĩri macari dija wahabũ. Eropigu Babilonia waĩcũri maca majarãre wũari maca majarãre guĩami Goãmu erãre dipuwaja moabu. Erã ñerire iiri dipuwaja erã mera turaro guĩami. Eropã guagu erãre burigã dipuwaja moami.

²⁰ Igũ eropa iicũ árĩpehreri nũguri, utã yucũ sã pehrea wahabũ. Eropiro ne marabũ.

²¹ Eropiro decoyeri pagayeri yũsariyeri yebague masa weca دچارabũ. Árĩpehreri decoyeri cuarenta kilo nũcũriyeri ahrabũ. Erã weca iri eropa دچارicũ Goãmu erãre igũ turaro dipuwaja moacũ masirã ñero wereniguiama masa Goãmure.

17

Ñerire iigore dipuwaja moadoregũcumi, arĩ werepũ Ñũ

¹ Pũhrũ siete parire oparã anyua mera majagu yũ pohrogue eragu õpa arãmi yũre:

—Igũ arique. Diari bajayari weca doagore uma mera ñero iiricũdigore Goãmu igũ dipuwaja moaborore igũ arique mũhũ.

² I yeba majarã oparã igo mera ñero iiro dopa ta igo yapũre gamema. Goãmupũre gamebi-rama. I yeba majarãre igo sihu merẽcũ iiro dopa ta, erã mera igo ñero iiro dopa ta igo masare

ñero iirire ʁaribejacũ iimo igo. Eropa iigo árĩpehreri ñerire erã iicũ iimurimo igo masare, arĩ wereami anyu yure.

³ Ĭgu eropa arĩra pũhrũ Espíritu Santo yure deyoro moarire ñacũ iiami. Eropigu anyu masa mariogue aĩ wahgãmi yure. Ero igo nomeore ĩhabũ. Igo nugũ majagũ diagũ weca peyago ãhramo. Nugũ majagupũ ĩgu dupũ baja waĩ erã gojatudigu ãhrami. Iri waĩ ñeri waĩ Goãmure ñeri wereniguri waĩ ãhrabũ. Eropigu siete dipucũgũ, diez gohra cusaricũgũ ãhrami nugũ majagũ.

⁴ Eropigo nomeopũ ñaro yahsari suhri oparã erã sañarino suhrire sañadigo ãhramo. Diari suhri sãre sañadigo ãhramo. Baja orore, wajacuri ʁtãre, perlayeri sãre tuhura suhriore sañadigo ãhramo igo. Eropigo oropare opámo igo. Iripare dicuri ñeri igo iira ãhrabũ. Ñero iigo burigã ñero iidigo árĩmo igo. Iri ñeri Goãmũ ĩgu ĩadiabirira ãhrabũ.

⁵ Igo diapo igo waĩ erã gojatudigo ãhramo. Iri waĩre ñaro masibea mari. Ōpa arĩ gojatura ãhrabũ igo diapogue: “Wuuri maca Babilonia ãhrimo. Igo árĩpehreri ñeri iinugadigo ãhrimo. Árĩpehrero majarã erã ñerire, Goãmure erã gamebiririre iinugadigo ãhrimo. Eropirã erã igore ĩhacũrã ñetariaro iirã iima,” arĩ, igo diapore erã gojatudigo ãhramo.

⁶ Eropa igore ĩagu igo bajarã Goãmũ yarãre igo wejẽdigo árĩcũ masiabũ yũhũ. Mererã erã mucubiro dopa ta igo erãre wejẽgo erã di cóãcũ ĩago mucubiridigo ãhramo igo. Jesure erã

cóãbiriri dipuwaja erãre wejêdigo âhramo igo.

Igore ãagu, ãha uca wahabu.

⁷ Eropigu ãgu anyu arãmi yure:

—¿Duhpigu ãha uca wahari muhu? arãmi yure. —Mu masibirirare mure ãhmugura. Igo nomeore mure weregura. Igo peyagu sãre weregura. ãgu nugu majagu âhrimi. Eropigu siete dipucugu, diez cusaricugu âhrimi.

⁸ ãgu mu ãadigu iribojegue árĩdigu árĩmi. Dohpaguere marimi ãgu. Puhru ãgu âhcãri gobegue árĩdigu wiriri dehyoagucumi daja. ãgu eropa wiririra puhru dederebu peamegue wagucumi. I yeba majarã ãgu dehyoacũ ãha uca wa, ãgure umupeorãcoma. I yeba árĩboro core Goãmu ãgu yarã árĩmorãre erã waĩre gojatudigu árĩmi. ãgu gojatubirininã âhrima nugu majagure umupeorã. ãgupu iribojegue árĩdi árĩmi. Dohpaguepure marimi. Puhru dipaturi dehyoagucumi daja. Eropirã masa ãgu dehyoacũ ãarã, ãha uca warãcoma.

⁹ “Dohpaguere yu wereburire ôaro masidiarã, ôaro peerãca mua, arĩnemoami yure daja. Eropirã pee masirã árĩque mua. Nugu majagu dipu, siete dipu siete utã yucu iro dopa âhraa. Iri utã yucu weca peyamo igo ñero iiricugo.

¹⁰ Iri dipu siete oparã sã iro dopa âhraa. Bajarã masa tauro oparã âhrima. Cinco oparãre cóãtuhama. Gajigu erã puhru árĩgu opu âhrimi dohpaguere. Gajigupu puhru opu ñajagucumi. Eropa ñajagu merogã opu árĩgucumi ãgu.

¹¹ Eropigu nugu majagu diagu core árĩdigu, dohpaguere marigu erã siete oparã puhru opu

árĩgucumi. Siete oparã mera majagu ãhrimi. Pũru peamegue dederea wagucumi.

¹² “Nũgu majagu cusari diez cusari diez oparã iro dopa ãhraa. Bajarã masa tauro oparã ãhrima. Erã oparã ñajanibeama dohpa. Pũrugue oparã ñajarã merogã oparã árĩrãcoma. Yoari boje oparã árĩdosome erãre. Eropa oparã árĩrã nũgu majagu mera oparã árĩrãcoma.

¹³ Erã diez oparã yujuro mera pepirã árĩrãcoma. Eropirã erã nũgu majagure erã ya yebari majarã tauro opu acurãcoma.

¹⁴ Eropirã Cordero mera gamewejẽ warãcoma erã. Erã eropa gamewejẽquerecũ ta Cordero ĩgu beyenirã mera ĩgure ne cóãbirinirã mera erãre tarinũgarãcoma. ĩgu árĩpehrerã gajirã tauro opu ãhrimi. Eropigu erãre tarinũgagucumi,” arãmi anyu yũre.

¹⁵ Ire yũre werenemoami anyu:

—Ñero iiricũgo mauri weca doago iimo. Iri mauri õpa iro dopa ãhraa: Baja yebari majarã, baja cururi majarã, baja disiri wereniguirã iro dopa ãhraa iri mauri. Erã bajarã weca ãhrimo igo.

¹⁶ Nũgu majagu, diez oparã mera ñero iiricũgore ĩhaturirãcoma. Erã diez oparã nũgu majagu mera igore goroweopeho igo yare emapehocã, suhri marigo cóãrãcoma igore. Eropa iirã igo dupũre barãcoma. Erã eropa iira pũru igore soepehocãrãcoma.

¹⁷ Erã diez oparã yujuro mera pepirã nũgu majagure erã ya yeba majarã tauro opu

acurãcoma. Erã eropa iicã apimi Goãmu ĩgu gamediro dopa ta iibure. Eropigu nugu majagupu opu árĩgucumi. Árĩpehreri Goãmu ĩgu iribojegue ĩgu werediro dopa ta ĩgu iira puhru nugu majagure cóãgucumi.

¹⁸ Igo mu ĩadigo mera õpa arĩ buhema: Igo wuuri maca Babilonia waĩcũri maca iro dopa ãhrimo. Árĩpehrerã gaji macari majarã tauro ãhrima iri maca majarã, arãmi anyu yure.

18

Babilonia waĩcũri maca coh moyoro

¹ Puhru gajigu anyure umarogue دچارigue ĩhabũ. ĩgu opu gohra ãhrami. Eropigu ĩgu gos-
esiriri árĩpehrerogue ãaro boyoro wahabũ.

² ĩgu eropa dijara puhru turaro gaguinigi wereami:

—Cóãcãmi. Babilonia waĩcũri macare wuuri macare iri maca majarã sãre cóãcãmi. Dohpaguere watẽa bajarã ñerã dupu deyobirã sã iri maca muraro árĩrã iima. Ñerã mirimagũ porã majarã sã masa erã ĩha doorã iri maca murarore árĩrã iima.

³ Iri maca majarã mura árĩpehreri yeba majarãre goroweonirã árĩma. Eropirã baja yebari majarã tauro oparã iri maca majarãre pee Goãmure cóãnirã árĩma. Erã ñeri uaribearire iidiarã cóãnirã árĩma Goãmure. Iri maca majarã baja gajinore wajapagari duarire gamenirã árĩma. Eropirã gaji macari majarã erãre duarã pagari dihta wajatanirã árĩma, arĩ wereami anyu.

4 Puhru dipaturi umarogue wereniguicũ peeabu. Ōpa arĩro carabu iri macare cóãboro core ĩgu wereniguirire:

—Mũa yaharã, iri maca majarã mera árĩbircãque mũa. Iri maca majarã mera mũa árĩcũ mũa sãre dipuwaja moagucumi. Eropirã iri macague ñero iirire ĩhacũbircãque.

5 Ero ñero iira baja árĩcãa. Iri maca majarã yoari boje burigã ñerire iituhajama. Eropigu yuhũ Goãmu iripêta erã ñero iicũ gahmea. Eropigu erãre dipuwaja moaguca.

6 Iri maca turaro dipuwajacuporo. Ero majarã masare erã ñero iidiro dopa ta erã sãre ñero taricũ iiporo. Masare erã ñero iidiro dopa ta erã tauro erãre ñero dipuwaja moaporo, arĩro carabu.

7 Iri maca majarã “Ōarã āhraa gua,” arĩ pepirima. Eropa arĩ pepirã, wajapagarire wũaro opáma erã. Erã wajapagarire wũaro erã oparopẽ ta turaro ñero taricũ iiporo. Eropirã erãre bujawerecũ iiporo. Erã basi ōpa arĩ pepirima erã: “Gũa i yeba majarã oparã árĩrã ĩiaa. Mo-jomorocurã árĩbeaa. Eropirã ne ñero tarisome gua,” arĩ pepirima erã.

8 Eropa arĩ erã pepirã árĩcũ yujunũ erãre guñaña mariro dipuwaja moaburinũ árĩroca, arĩro carabu. Irinũ sĩriri, dorecuri, co oreri, oaboari árĩroca. Eropigu iri macare soepe-hocãgucumi, arĩro carabu. Mũa opu Goãmu iri macare dipuwaja moadoregu turatariagu āhrimi. Eropigu eropa ta ĩgu arĩdiro dopa ta iri macare dipuwaja moadoregucumi, arĩro carabu umarogue.

⁹ Eropirã Goãmũ iri macare ĩgu dipuwaja moacũ ĩha i yeba majarã oparã burigã bujawere orerãcoma. Erã iri maca majarã mera ñerire iirã ôaro mucubirirã árĩmurinirã árĩma. Eropirã iri maca ũjucũ ĩarã orerãcoma erã.

¹⁰ ĩgu iri macare eropa soecũ ĩarã oparã gaji yeba majarã yorogue ĩhabeoniguirãcoma gua sãre dipuwaja moari arĩrã. Ero ĩhabeoniguirã ôpa arĩrãcoma:

—Ade. Mojomorocuri maca āhraa Babilonia. Si maca wuuri maca turari maca árĩrabũ. Mata yojaro mera si macare dipuwaja moami, arĩrãcoma erã.

¹¹ I yeba majarã doberi duarã iri maca ũjucũ ĩarã burigã bujawere orerãcoma erã sã. Iri maca pehrecũ ĩarã, erã ya doberire asũrã maricũ ĩarã bujawere orerãcoma. Eropirã orerãcoma.

¹² Erã aĩgãrirare, orore, platare, wajacuri utãre, perla waĩcuri dipu sãre asũrã marirãcoma. Eropi gaji erã aĩgãrirare suhri ôarire wajapagarire, yahsari suhrire, oparã erã sañari suhri dopa bejarire, seda waĩcuri suhrire, diari suhrire asũrã marirãcoma. Eropi gaji erã aĩgãrirare yucũ poresuri yucũre asũrã marirãcoma. Eropi gajire erã aĩgãrirare marfil waĩcuri mera erã iirare, wajacuri yucũ mera erã iirare, bronce mera erã iirare, come mera erã iirare, marmol mera erã iirare asũrã marirãcoma.

¹³ Eropi erã aĩgãrirare canela waĩcũre, gaji bari usuricũ iirire, inciensore, mirra waĩcuri poresurire, gaji poresurire asũrã marirãcoma. Eropi gaji erã aĩgãrirare vinore, uyũre, trigo pog-

are, trigore, wecuare, ovejare, cabayuare, tūruri gasire, pohro majarāre asūrā marirācoma. Eropirā bujawererācoma doberi duari masa.

¹⁴ Eropirā ōpa arīrācoma erā iri maca majarā mūrare:

—Ade. Ńetariaro wahari erā. Árīpehreri erā mahira mura pehrea wahaa. Eropiro árīpehreri erā ōarire erā wajapagari opara pehrea wahaa. Eropirā iri dipaturi bocasome mari, arīrācoma doberi duari masa.

¹⁵ Erā iri macare doberi duarā wuaro wajatamūrīnirā árīma. Eropirā erā iri macare yoarogue iħu niguirācoma gua säre dipuwaja moari arīrā ucarā. Eropa iħabeorā iri macare burigā bujawere orerācoma.

¹⁶ Ōpa arīrācoma iri macare:

—Ade. Ńetariaro wahaa iri maca wuari maca. Si maca majarā ōarire opamūrīrima. Nomeo ōari suhrire, wajapagari suhrire, yahsari suhrire, diari suhri säre sañago dopa ōarire opamūrīrima. Eropirā oro wajapagari utā, perla dipu waĩcūri tuhura suhriro sañamūrīma. Wuaro opamūrīma si maca majarā.

¹⁷ Eropiro mata si maca wuaro dobericūri maca dederea wahaa, arīrācoma iri macare.

Eropirā árīpehrerā dohori gasi mera curirā, iri gasi oparā, erā uma, gajirā wuariyague mohme wajatarā sã iri macare yoarogue iħu niguirācoma erā sã.

¹⁸ Ero iħabeorā iri macare ujucū iārā ōpa arī gaguiniguirācoma:

—Paga macari si maca iro dopa árīri macari ne gaji maca mara, arī gaguiniguirācoma erā.

19 Eropa bujawererã árĩrã erã dipu weca nicure ñaji peorãcoma. Eropirã co orerã òpa arĩrãcoma:

—Ade. Ñetariaro wahaa si maca muraro. Òari maca árĩribũ. Árĩpehrerã dohori gasi oparã wũariyague curirã si maca maja doberi mera òaro wajataribũ mari. Eropiro mata si maca dederepehrea wahaa, arĩrãcoma gasi majarã, arĩ werero carabũ yare umarogue.

20 —Iri macare ìgu cóãcũ ìarã mucubirique mũa, umaro majarãpũ, arĩro carabũ. —Goãmu yarã, Jesu ìgu apinirã, ìgu yare weremuhtanirã árĩpehrerã mũa mucubirique. Iri maca majarã mũare ñero taricũ iima. Erã eropa iira dipuwaja, dipuwaja moami Goãmu. Eropirã mucubirique mũa, arĩro carabũ.

21 Eropa arĩ wereniguirare peera pũhrũ òpa ìhabũ yũhũ. Turagu anyu wũariye utãyere aĩ wahgũ, wũariyague mehyuami. Eropa mehyugu òpa arãmi:

—Iye utãyeyuriñajadiro dopa ta wũari maca Babilonia waĩcũri maca turaro yuhridijaro busuroca. Eropa yuhridijara pũhrũ iri macare dipaturi ìasome mũa.

22 Iri macare dederea wacũ iigucumi. Eropiro ne iri macare bayarire mũa peediro dopa árĩsome. Arpa buamutẽri, flauta dipurure, corneta sãre ne dipaturi peeya mariroca. Eropirã iri maca maricũ ero mohmenirã dipaturi erore mohmesome. Eropiro trigo yeri utã mera erã oera sã ne peeya mariroca.

23 Iri maca boyo oyadiro dopa ne árĩsome. Eropirã mojoto dirinirã erã mucubiri

wereniguidiro dopa ne dipaturi árísome. Iri maca majarã doberi duarã asũrã mera gajirã tauro opamurima erã. Eropirã iri maca majarã yeea erã purisiriri mera árĩpehrero majarãre gũyamurima. Eropirã ñerire Ɂaribeja, Goãmũpũre gamebirimurima masa, arãmi yũre turagu anyu.

²⁴ Iri maca majarã Goãmũ yare weremũhtanirãre gajirã ĩgu yarã sãre árĩpehrero majarãre wejẽmurinirã árĩma. Erã eropa wejẽra dipuwaja, gajĩ ñero iira dipuwaja sãre dipuwaja moãmi Goãmũ iri macare.

19

¹ Babilonia macare ĩgu cóãrare yũ ĩara pũhrũ Ɂmarogue bajarã gaguiniguirã carama yũ peecũ. Õpa arĩ gaguiniguirã carama:

Aleluya. Goãmũre õaro wereniguirã. Goãmũ marire taugu āhrimi. ĩgure õaro umupe-orã. Turatariagu āhrimi ĩgu.

² Gũyaro mariro queoro iigu masare dipuwaja moami ĩgu. Ñeri dipuwaja moorãre erãre dipuwaja moabeami. Igo nomeo ñerire iiricũgo Babilonia waĩcũri maca āhrimo. Iri maca majarãre ĩhacũrã i yeba majarã ñero iimurima. Eropigu iri maca majarãre dipuwaja moami Goãmũ. Eropigu ĩgu dorerire iinirãre ĩgu pohro majarãre erã wejẽra dipuwaja dipuwaja moami ĩgu, arĩ gaguiniguirã carama.

³ Dipaturi gaguiniguirã carama daja:

—Aleluya. Goãmũre õaro wereniguirã. Iri maca ñero iira maca ĩgu soera maca eropa imicacũniguiçãroca, arĩ gaguiniguirã carama.

⁴ Eropirã veinticuatro Jesu yarã oparã, wapicurã gajiropa bejarã mera mereja, Goãmure mari Pagure ïgu doarõ doagure umupeoama. Õpa arĩ umupeoama erã:

—Amén. Aleluya. Eropa ãhraa. Mari Pagure õaro wereniguirã, arãma erã.

⁵ Pũhrũ opũ doarogue õpa arĩro carabũ:
Mari Opũ Goãmure umupeoque. Mũa ïgu pohro majarã, ïgure umupeorã bu árĩrã, oparã sã árĩpehrerã mũa ïgure õaro wereniguique, arĩro carabũ.

Cordero ïgu mojoto diriburinũ bosenure werepũ Ñu

⁶ Pũhrũ bajarã masa erã wereniguirã caracũ peeabũ. Erã utãmu iro dopa bupu iro dopa bũsurã carama yũ peecũ. Õpa arĩ gaguiniguirã carama:

Aleluya. Goãmure õaro wereniguirã. ïgu mari Opũpũ opũ ñajatuhami. Turatariagu ãhrimi ïgu.

⁷⁻⁸ Cordero ïgu mojoto diriburi bosenu ãhraa dohpaguere. ïgu mojoto diribo õaro amudigogue ãhrimo. Igo õari suhriore gũhrari mariri suhriore sañatuhamo. Iri suhriro Goãmũ yarã õarire erã iira iro dopa ãhraa. Eropirã mucubirã mari. Goãmure “Õatariagu ãhrimi,” arĩ umupeorã mari ïgure, arĩ wereniguirã carama.

⁹ Erã eropa arĩra pũhrũ anyupũ arãmi yũre:

—Ire goja aĩque. “Cordero ïgu mojoto diriri bosenure ïgu sihubeonirã mucubirã ãhrima,” arĩ goja aĩque, arãmi yũre anyu.

Eropa arĩgu ta õpa arĩnemoami:

—Diaye ta āhraa i yu werera. Goāmū ya wereniguiiri āhraa, arīnemoami yure.

¹⁰ Īgu eroparīcū peegu ĩgure mereja umupeobu iirabu. Yu merejacū gohra ōpa arāmi yure:

—Yure mereja umupeobita. Mu ārīro dopa ta Goāmū pohro majagu ta āhraa yu sā. Mu acawererā Jesu yarā ārīpehrerā ĩgu ya buherire werenirā iro dopa yu sā Goāmū pohro majagu āhraa. Eropigu Goāmūpure mereja ĩgūpure umupeoque, arāmi yure anyu.

Goāmū yare weremūhtanirā iribojegue majarā Espíritu Santo ĩgu itamuro mera Jesu ya buherire ta wereyuñuma.

Cabayu boregu weca peyagure werepū Ńu

¹¹ Pūhru ūmaro pārīmaacū ĩhabu. Ero cabayu boregu āhrami. Īgu weca peyagu ōpa waīcuami: Īgu arīro dopa ta iigu diaye iigu waīcuami ĩgu. Eropigu masare dipuwajare moagu ĩgu ĩhaturirā mera gamewejēgu ōaro gūyaro marīro iiami.

¹² Īgu cuiri peame porā iro dopa āhrabu. Eropiro ĩgu dipuru weca baja oparā peyari berori āhrabu. Eropigu ĩgu dūpure ĩgu waīre gojatudigu āhrami. Īri waīre ĩgu dihta masiami. Gajirā masibirama.

¹³ Īgu sañariñe yoariñe di tuyariñe āhrabu. Īgu ōpa waīcuami: Goāmū ya wereniguiirire weregu waīcuami ĩgu.

¹⁴ Eropirā ĩgu yarā surara ūmarogue majarā ĩgure nūrusiāma. Borerā cabayua weca peyarā

ãhrama. Ôari suhrire boreri suhrire, guhrari mariri suhrire sañanirã ãhrama.

¹⁵ Īgu erã opu wamũhtadigu ĩgu disiro ñoserimiji usirimiji cuñuami. Īrimiji i yeba majarãre ĩgu tarinũgaburimiji ãhrabu. Eropigu ĩgu turari mera ĩgu dorecũ ne yujugu ĩgure tarinũgagu ĩgure bocatĩusome. Igui dipurare erã ñatĩacũ igui deco wiriro dopa ta i yeba majarã ñerãre di wiriroca ĩgu erãre dipuwaja moacũ. Goãmu erã mera guami. Īgu eropa guagu árĩcũ cabayua weca peyagu dipuwaja burigã moagucumi.

¹⁶ Īgu suhriro, ĩgu ñigagu sãre iri waĩre gojatudigu ãhrami: “Árĩpehrerã gajirã tauro opu waĩcumi,” arĩ gojatudigu ãhrami.

¹⁷ Pũru abegue niguigure anyu niguigure ĩhabu. Árĩpehrerã umarogue wũrãre goro porã majarãre gaguiniguibeoami ĩgu. Ōpa arĩ turaro gaguiniguibeoami erãre:

—Gamenererã arique. Goãmu ĩgu bosenu wũari bosenu barã arique.

¹⁸ Baja yebari majarã tauro oparã mũrare, surara oparã mũrare, surara bajarã mũrare, cabayua mũrare, erã weca peyarã mũrare, árĩpehrerã gajirã masa mũrare, pohro majarã mũrare, pohro majarã árĩbirã mũrare, gajirã oparã mũrare, bu árĩrã mũrare barã arique. Erã árĩpehrerã dupu mũrare barã arique, arĩ gaguiniguibeoami anyu goro porã majarãre.

¹⁹ Eropigu ngu majagure, i yeba majarã tauro oparã erã surara bajarã sãre ĩhabu.

Erã gamenerenirã âhrama cabayu weca peyagu mera ïgu surara bajarã mera gamewejẽmorã.

²⁰ Erã eropa gamewejẽcũ cabayu weca peyagu nugu majagure peresu iiami. Gajigu “Goãmu yare wereniguigu âhraa,” arĩ guyadigu sãre peresu iiami. ïgu guyadigupu nugu majagu ïgu ïhuro deyro moarire iibasadigu âhrami. ïgu deyro moari mera nugu majagu ïgu waĩre tyanirãre, ïgu masu wéadigure umupe-orãre guyadigu âhrami. “I Goãmu ya âhraa,” arĩgu guyamuridigu âhrami. Erãre perãre ïgu peresu iira puhru erãre ojocarirãre ta peamegue cõhãmi. Iri peame wuaria iro dopa wuaria peame azufre mera ujuri peame âhrabu.

²¹ Eropigu duhyarãre erã surara arĩnirãre ñoserimiji mera ïgu disiro cuñurimiji mera wejẽami cabayua weca peyagupu. Eropa ïgu wejẽra puhru goro porã majarã erã dupu murare barã yapitaria wahãma.

20

Mil bojori gohra Cristo ïgu yarã mera masare doregucumi, arĩ gojañumi Ñu

¹ Puhru gajigu anyu umarogue ïgu dijaricũ ïhabu. Ëhcãri gobe maja sawire, wuarida comeda sãre opãmi ïgu.

² Eropa dijarigu pĩrure ñeãmi ïgu. ïgu pĩru iribojegue pĩru dupucugu arĩgu, watĩ Satana waĩcugu âhrami. ïgure ñeagu dihriami mil bojori gohra peresu iibu.

³ Eropa dirituha ãhcãri gobegue cohã dijuami ïgu i yeba majarãre mil bojori gohra ïgu

guyamasibiriborore. Eropa cóātuhagu iri gobere biha, sawi biacāmi. Eropigu mil bojori pūhrū dipaturi ĩgure bajamenurīgā wiunigucumi daja.

⁴ Pūhrū oparā doarire ĩhabū. Iri doarire doarā sāre ĩhabū. Erāre masare erā beyedoboborore apiami Cristo. Gajirā sāre ĩhabū. Erāpū Jesu yare Goāmū yare erā werera dipuwaja erāre dipure tabe cóānirā āhrama. Nūgū majagure, ĩgū wéadigū sāre ne umupeobirininā āhrama. Eropirā erā diaporire erā mojotori sāre ĩgū waĩre gojatudorebirininā āhrama erā. Eropirā gajirā erāre wejēnirā árĩma. Erāre wejēra pūhrū masa mūria wanirā árĩma. Masa mūriarā erā mil bojori gohra Cristo mera oparā árĩrācoma.

⁵ Gajirā Cristo yarā sīrinirā mūra masa mūrianibirama dohpa. Erā wejenirā erā masa mūriara pūhrū mil bojori oparā erā árĩra pūhrū gajirā sā masa mūriarācoma. Eropirā erā wejēnirā mūra Cristo pūhrū masa mūriamūhtarā árĩrācoma.

⁶ ĩgū masumūhtanirāpū turaro mucubirirā árĩrācoma. Neri marirā árĩrācoma erā. Eropirā peamegue wasome erā. Eropirā Goāmū yare Cristo yare erā sā serēbasarā pahia árĩrācoma erā. Eropirā erā masa mūriamūhtarā mil bojori gohra Cristo mera masa tauro oparā árĩrācoma.

Satana dederea wagucumi, arĩ gojañumi Ñu

⁷ Mil bojori pūhrū Satanare peresu árĩgure wiugucumi.

⁸ ĩgū eropa wirira pūhrū árĩpehrero i yeba majarāre guyagu wagucumi ĩgū, “Ina

gamewejêrã warã,” arĩgu. Gog waĩcurãre, Magog waĩcurã sãre guýagu wagucumi. Eropirã erã ĩgu guýarire peerã, erã surara majarãre gameneorãcoma gamewejêmorã. Erã surara majarã bajarã gohra árĩrãcoma. Wuaríya maja imipa árĩro utãburuyeri nucu dopa erã surara bajarã árĩrãcoma

⁹ Eropirã i yebaguere wasirirã, Goãmũ yarã erã árĩri macare Goãmũ ĩgu mahiri macare cãhmotanugajarãcoma. Erã eropa cãhmotanugajara puhru Goãmũ erãre umaro maja peame mera soe mehdijucãgucumi.

¹⁰ Eropa wara puhru watĩre erãre guýagure peamegue cóãgucumi. Iri peame wuaríya iro dopa árĩri peame azufre mera ãjuri peame ãhrabu. Eroque ngu majagure “Goãmũ yare weregu ãhraa,” arĩ guýagure cóãtuhajami. Ero erã árĩcũ umuri nucu pũriroca erãre.

Masare Goãmũ dipuwaja moatugucumi, arĩ gojañumi Ñu

¹¹ Puhru wuaro opu ĩgu doarore ãaro borero ĩhabũ. Iri doaró weca doagu sãre ĩhabũ. Eropiro ĩgu árĩroque mata i yeba umaro sã dederea wahabu. Ne deyobirabu pare.

¹² Eropigu opu pohro sĩrinirã mura erã niguicũ ĩhabũ. Erã bu árĩrã, oparã mura sã ãhrama. Ero erã niguicũ ĩgu gojaturapũrire pãgũami. Iripũri masa erã iirare ĩgu gojaturapũri ãhrabu. Eropigu ĩgu opu beyegu iripũre ĩatuha erã iirare masiami. Irire masigu sĩrinirãre beyeami ñerã, ãarã. Puhru gajipũ sãre pãgũami. Iripũ

Goãmũ mera eropa árĩniguimorãre erã waĩre erã gojaturapũ àhrabũ.

¹³ Wũariyague miri sĩrinirã mura, diague erã cóãnirã mura sã masa muria waháma. Eropirã yeba pohecague árĩnirã mura, sĩrinirã erã árĩroque árĩnirã mura sã masa muria waháma. Erã eropa murijacũ ero doagu erã iirare masigu erãre beyeami. Õarãre, ñerãre beyeami.

¹⁴ Pũhrũ sĩririñere, sĩrinirã erã árĩro sãre cóãcãmi Goãmũ dipaturi mari sĩribiriboro dopa. Peamegue irire cóãcãmi. Iri peame wũariya iro dopa árĩri peame àhrabũ. Goãmũre gamebirãpũ peamegue warã dipaturi sĩrirã dopa wahama.

¹⁵ Eropigu ìgu mera árĩniguimorã erã waĩre Goãmũ ìgu gojaturapũ árĩpehrerã gojatusũya marirãpũre peamegue cõhámi ìgu.

21

Umaro, yeba sãre mamare gohrotogũcumi Goãmũ, arĩ gojañumi Ñu

¹ Pũhrũ umaro, yeba sãre mamare ìgu gohro-torare ìhabũ. Árĩmũhtara mura umaro, yeba, pagayari sã pehrea wahabũ. Marabũ.

² Eropigu yũhũ Ñu òari macare, mama macare Jerusalén waĩcũri macare ìhabũ. Iri maca umarogue Goãmũ pohroque دچارicũ ìhabũ. Õaro dehyoabũ iri maca. Mojoto diribo igo marapũre mucubiriborore òari suhri sã igore òaro amuro dopa àhrabũ iri maca. Õpa iro dopa ta iri macare amuyudi árĩmi Goãmũ ìgu yarãre mucubiricũ iibu.

³ Irire yu ĩara pũru opu doarogue gaguiniguicũ peeabu:

—Ĩaque. Dohpaguere masa watope árĩgu iimi Goãmu. Erã mera árĩgucumi ĩgu. Eropirã ĩgu yarã árĩrãcoma erã. Eropigu Goãmu ĩgu basi erã mera majagu árĩgu, erã yagu Goãmu árĩgucumi.

⁴ Eropigu eropa mucubiriniguicũ iigucumi ĩgu erãre. Eropirã dipaturi bujaweresome erã. Eropirã ne dipaturi sĩrisome erã. Ne ñero sĩporãcũri, co oreri, pũriri sã mariroca erãre. I árĩpehreri iribojegue maja pehrea waroca erãre, arĩ gaguiniguigu carami.

⁵ Pũru opu doarogue doagu õpa arãmi:

—Ĩaque. Árĩpehrerire mama gohrotocũ iiguca, arãmi.

Ĩgu eropa arĩra pũru yure õpa arãmi daja:

—Yu arĩrire goja aĩque. Yu arĩri diaye ta ãhraa. Eropiro yu arĩdiro dopa ta eropa waroca. Eropigu yu arĩrire goja aĩque, arãmi yure.

⁶ Pũru õpa arãmi daja yure:

—Iripẽta árĩca. Yu árĩpehrerire ĩhacũnugudigu ãhraa. Eropigu árĩpehrerire pehrecũ iibu ãhraa daja. Ñemesiburã erã turaro ĩhridiario dopa ta yu pohroque wadiarã Jesure gamerãcoma. Eropirã Jesure yũhrirãcoma. ĩgu ojocaririre oro deco iro dopa ãhrimi. ĩgure gamerãre waja gamero mariro yu mera eropa árĩniguiborore ogura erãre.

⁷ Árĩpehrerã ñero tariquererã yure umupeo-duhubirãre õpa iigura: Erã Goãmu árĩgura. Eropirã erãpu yu porã árĩrãcoma.

⁸ Erã eropa árĩquerecũ masare güi yaharare duhurã, yahare gamebirã, ñetariarire iirã, masare wejẽrã, nome mera ñero iirã, ɯma mera ñero iirã nome, yeea, goãmarã wéanirãre umu-peorã, árĩpehrerã gɯyarã peamegue warãcoma. Ero wɯariya iro dopa árĩri peame azufre mera ɯjuri peame ãhraa. Erogue warã dipaturi erã sĩriro dopa ta warã iirãcoma, arãmi yure.

Mama maca Jerusalénre werepɯ

⁹ Pɯhrɯ yujugɯ anyu yɯ pohrogue erãmi. Ĩgɯ siete pari opanirã mera majagɯ ãhrami. Ĩgɯ dipuwaja moadoregɯ ĩgɯ apinirã mera majagɯ sã ĩgɯ anyua mera majagɯ ãhrami. Eropa eragɯ òpa arãmi yure:

—Ĩagɯ arique. Cordero ĩgɯ mojoto diribore ĩhmugɯca mure, arãmi anyu yure.

¹⁰ Eropigɯ Espíritu Santo yure Goãmɯ ya macare ĩacũ iiami. Eropigɯ ɯmadigɯ ɯtãgɯ wecague yure aĩ mɯriãmi. Erogue Goãmɯ ya macare Jerusalénre òari macare ĩhmuami yure. Iri maca ĩgɯ mojoto diribo iro dopa ãhrabɯ. Goãmɯ pohrogue ɯmarogue dijariro iiabɯ iri maca.

¹¹ Goãmɯ ĩgɯ gosesiriri mera gosesiriabɯ iri maca. Wajacuri ɯtã iro dopa gosesiriabɯ. Jaspe waĩcuri ɯtã gosesiriro dopa gosesiriabɯ. Eropiro vidrio iro dopa òaro deco sɯriabɯ iri maca.

¹² Eropiro wɯari sãriro ɯmari sãriro erã sãri sãra maca ãhrabɯ. Doce gohra disipororicɯabɯ iri sãriro. Iri disipororire cohreama anyua. Iri maca disiporori bihariserigue Israe masa cururi doce cururi nɯcɯ erã waĩ tuhyabɯ.

¹³ Abe mʉririropʉ iri sʉriro opabʉ ʉhre disiporo. Surpʉ ʉhre disiporo opabʉ. Nortepʉre ʉhre disiporo opabʉ. Abe ʉajaropʉ sʉre ʉhre disiporo opabʉ. ʆripehrero doce disiporori gohra opabʉ iri sʉriro.

¹⁴ Iri sʉriro doce ʉtʉ weca peyabʉ. Iri ʉtʉ nʉcʉ Cordero ʆgu apinirʉ doce ʆgu apinirʉ gua yujurʉyeri wʉi tuhyabʉ.

¹⁵ Eropigʉ anyu yʉre weregu queodigʉ oro mera erʉ iidigure opʉmi. Iri macare, iri maca maja disiporori sʉre, iri sʉriro sʉre queobu iiami.

¹⁶ “Iri maca yoaropʉ ta ehyaa,” arʉmi queo-tuhagʉ. “ʆmaro sʉ iripʉta ʉmaa,” arʉmi. Eropigʉ anyu ʆgu queodigʉ mera iri macare queoami. Iri maca dos mil doscientos kil6metros yoari maca ʉhrabʉ. Iripʉta ehyari maca ʉhrabʉ. Iripʉta ʉmaro ʉhrabʉ.

¹⁷ Eropigʉ iri maca maja sʉrirore queoami anyu. “ʆesenta y cuatro metros ʉmaa,” arʉmi. Mari masa queoro dopa ta queogu iiami ʆgu.

¹⁸ Iri sʉriro jaspe wʉcʉri ʉtʉ mera ʆgu iira sʉriro ʉhrabʉ. Eropiro iri macapʉ oro mera ʆgu iira maca ʉhrabʉ. Iri oro guhrari mariri ʆriro 6aro deco sʉriabʉ.

¹⁹ Iri sʉriro doca ʆriri ʉtʉre baja gajiropa ʆririyeri tuhyabʉ 6aro deyoboro dopa. Iriyeri wajapagariyeri ʉhrabʉ. Iriyeri tuyara ʉtʉ sʉriro doca oyari ʉtʉ doce ʉtʉ ʉhrabʉ. ʆriʉmʉhtari yegue jaspe wʉcʉri ʉtʉyeri tuhyabʉ. Iriye pʉhrʉ maja yeguere safiro wʉcʉri ʉtʉyeri tuhyabʉ. Peye pʉhrʉ maja yeguere ʉgata

waĩcũri tuhyabũ. Ʋhreye pũhrũ yegueresmeralda waĩcũri utũyeri tuhyabũ.

²⁰ Wapicũriye utũye pũhrũ maja yegueresónice waĩcũri utũyeri tuhyabũ. Yuju mojtocũ maja pehreri utũ pũhrũ maja yegueres cornalina waĩcũri utũyeri tuhyabũ. Seis pũhrũ majaye utũyegueres crisólito waĩcũri utũyeri tuhyabũ. Siete pũhrũ árĩriye utũyegueres berilo waĩcũri utũyeri tuhyabũ. Ocho pũhrũ árĩriyegueres topacio waĩcũri utũyeri tuhyabũ. Nueve pũhrũ árĩriyegueres crisoprasa waĩcũri utũyeri tuhyabũ. Diez pũhrũ árĩriyegueres jacinto waĩcũri utũyeri tuhyabũ. Once pũhrũ árĩriyegueres amatista waĩcũri utũyeri utũtuyabũ.

²¹ Eropiro doce disiporori doce perla mera ĩgu iiraseri āhrabũ. Irĩseri nũcũ yujuye perlaye mera ĩgu iira dihta āhrabũ. Eropiro iri maca wari maha oro mera ĩgu iira maha āhrabũ. Iri oro guhrari mariri oro āhrabũ. Eropiro ōaro deco sũriri maha āhrabũ iri maha.

²² Iri macare Goāmũ wihire ĩabirabũ. Marabũ. Iri maca árĩpehrerogue mari Opure Goāmũ turatariagure, Cordero sãre umupeoama masa. Eropiro iri maca árĩpehrero Goāmũ ya wihi iro dopa āhrabũ.

²³ Eropigũ iri maca Goāmũ ĩgu gosesiriri mera ōaro boyoabũ. Cordero sã sihãgodiru iro dopa boyoami. Eropirã abe umũ majagũ sãre ñami majagũ sãre ero boyocũ gamebirama.

²⁴ Eropirã i yeba majarã Goāmũ Cordero sã boyori mera árĩrãcoma Goāmũ ĩgu tau-nirã. Eropirã árĩpehreri yeba majarã oparã iri

macague òatariari erã oparire aĩrã erarãcoma.

²⁵ Eropiro ɯmure iri maca maja disiporori pãgũra disiporori áĩroca. Eroguere ne ñami mariroca. Eropirã iri disiporore ne bihasome. Eropiro toyonigua.

²⁶ Eropirã baja yebari majarã òarire erã oparire iri macague aĩrã erarãcoma.

²⁷ Ñeripure iri macaguere ne aĩsome. Guhyasĩricũ iirã, ñerire iirã, ne iri macaguere wasome. Gũyarã sã wasome. Cordero ĩgu gojarapũ erã waĩ gojatusũnirã dihta iri macaguere warãcoma. Iripũ ĩgu taurã erã waĩre ĩgu gojaturapũ áhrra. Iripũgue erã waĩ gojatusũnirã eropa áĩniguicãrãcoma ĩgu mera.

22

¹ Pũhrũ òariyare ojocaricũ iiriyare ĩhmuami yure anyu. Iriya deco sũririya Goãmũ, Cordero sã erã doarogue aririya áhrabũ.

² Eropiro iri maca deco yuriabũ iriya. Iriya pepuri masegue ojocaricũ iiri yucũ niguiabũ. Iri yucũ aberi nũcũ dũcacũ. Yuju bojore doce suburi dũcacũ. Eropirã iri yucũ maja pũri mera òaro ococũrãcoma masa i yeba majarã.

³ Iri macare ne pũriri mariroca. Iri maca Goãmũ ĩgu opu áĩro áĩroca. Cordero ĩgu opu áĩro sã áĩroca iri maca. Eropirã ĩgu pohro majarã áĩrã ĩgu pohro mereja ĩgure umupearãcoma.

⁴ Erã Goãmure òaro ĩaniguicãrãcoma. Eropirã erã diaporire erã ĩgu waĩre tuyasũrã áĩrãcoma.

⁵ Eroguere ñami ne mariroca. Eropirã sihãgori dipurare gamesome ero árĩrã. Abe ïgu boyocũ sãre gamesome. Mari Opũ Goãmũ ïgu boyoro árĩroca. Eropirã iri maca árĩrã gajirã tauro oparã eropa árĩniguirãcoma.

Jesucristo i yebague ïgu dujariboro merogã dũhyaa, arĩ gojañumi Ñu

⁶ Pũhrũ anyu yũre õpa arãmi:

—Árĩpehrerire mũ ïha gojara diaye ãhraa. Eropiro gua mũre eropa arĩdiro dopa ta eropa waroca. Mari Opũ Goãmũ ïgu yare weremũhtarãre masicũ iigu ãhrimi. Ñũpũ dohpaguere yũre ïgu yagu anyure obeomi ïgu pohro majarãre masicũ iibu. Pũhrũ maja dohpa waborore masicũ iibu, ïgu yũre ïgu yagu anyure obeomi, arãmi anyu yũre.

⁷ Jesupũ õpa arãmi:

—Peeque mũa. Merogã dũhyaa yũ dujariboro. Ipũ maja weremũhtarire tarinũgabirininĩrã mucubirirã árĩrãcoma, arãmi Jesu.

⁸ Yũhũ Ñu i árĩpehrerire yũ goja aĩrare peeabũ. Eropigu irire ïhabũ. Eropigu yũ peera pũhrũ, yũ ïara pũhrũ yũre ïhmudigu anyu pohro merejarabũ umupeobu.

⁹ Yũ eropa iicũ ïagu õpa arãmi yũre:

—Yũre mereja umupeobita. Mũ iro dopa ta yũ sã Goãmũ pohro majagu ta ãhraa. Mũ acawererã Goãmũ yare weremũhtarã, árĩpehrerã ipũ maja dorerire iirã sã erã árĩro dopa ta yũ sã Goãmũ pohro majagu ta ãhraa. Eropigu Goãmũpũre mereja ïgũre umupeoque, arãmi anyu yũre.

¹⁰ Eropigu òpa arĩ werenemoami yure:

—Ipũ mũ goja aĩrapũ pũhrũ maja dohpa waborore werea. Eropa waboro merogã ãhyaa. Eropa árĩcũ ipũ wererare dibubita mũhũ.

¹¹ Irisubu yũ wererisubure ñerãpũ eropa iiniguicoma ñerire. Õarãpũ òaro iiniguima. Eropirã erãpũ ñeri marirã árĩrãcoma, arãmi yure anyu.

¹² Õpa arãmi Jesu:

—Peeque mũa. Merogã ãhyaa yũ dujariboro. Mũare yaharãre yũ wajayeborore aĩgãribu iiaa. Eropigu òarire mũa iira waja mũare òaro iigũra.

¹³ Yũhũ árĩpehrerire ñhacũnugudigu ãhraa. Eropigu árĩpehrerire pehrecũ iibu ãhraa.

¹⁴ “Árĩpehrerã guhrari mariri suhrire sañanirã árĩro dopa ta erã ñeri iirare coenirã iri macaguere ejarãcoma. Eropirã iri maca maja yucũ ojocaricũ iiri yucũ ãcare barãcoma. Eropirã mucubirirã árĩrãcoma erã.

¹⁵ Iri macague ejabirãpũ òpa ãhrima: Ñetariarã, yeea sã, nome mera ñero iirã, ũa mera ñero iirã nome, masare wejẽrã, goãmarã wéanirãre umupeorã, guyaricũrã sã ãhrima iri macague ejabirã, arãmi Jesu.

¹⁶ Eropigu òpa arĩnemoami Jesu yure:

—Yũhũ Jesu yahagũ anyure obeoabũ mũare yaharãre ipũ majare werebure. Opũ Davi árĩturiagũ pãrami ãhraa yũhũ. Yũhũ boyomũriridiru iro dopa árĩgu mũare òaro árĩcũ iigu ãhraa, arĩ werenemoami Jesu.

17 Espíritu Santo Jesure “Dujarique,” arĩmi. Jesu yarã sã ĩgu mojoto diribo dopa árĩrã, “Dujarique,” arĩma. Árĩpehrerã erã “Dujarique,” erã arĩcũ peerã sã, “Dujarique,” arĩporo Jesure. Ñemesiburã decore erã turaro gamero dopa ta Goãmũ pohrogue wadiarã Jesure turaro gameporo. ĩgu ojocaricũ iiri deco iro dopa āhrimi. ĩgu gamerãre waja gamero mariro ɯmarogue erã eropa árĩniguicãborore ogɯcumi Goãmũ.

18 Yũhũ Ñu árĩpehrerã ipũ maja wererire, Goãmũ yare weremũhtarare peenirãre ōpa arĩ ɯare guhyadiaro mera weregura. I buheri mera gaji buheri mera moresũ werenemorã Goãmũre tarinũgarã iima. Erã eropa tarinũgacũ ĩagu árĩpehreri ipũ ĩgu dipuwaja moaburire ĩgu werero dopa ta apigɯcumi erã sãre. Eropigũ eropa erã sãre dipuwaja moagɯcumi.

19 Eropirã ipũ maja wererire i Goãmũ yare weremũhtarare goroweorã Goãmũre tarinũgarã árĩrãcoma. Erã eropa tarinũgacũ ĩagu ojocaricũ iiri yucũ dɯcare erãre badoresome. Eropirã Goãmũ mera árĩniguisme erã. Eropirã ĩgu ya macague ōari macague wasome erã. Iri yucure, iri maca sãre ipũ mera erã wererague āhraa.

20 Árĩpehreri ipũ majare weregũ Jesucristo ōpa arĩmi.

—Eropa ta āhraa. Merogã dũhyaa yũ i yebague dujariboro, arĩmi ĩgu.

Eropigũ yũpũ ōpa arĩtugũ iiaa.

—Eropa ta iique. Gũa Opũ Jesu dujarique, arãa yũhũ.

²¹ Mari Opu Jesu ãgu itamuro mera árĩpehrerã
mua Goãmũ yarã õaro árĩque. Eropa ta árĩrã.
Iripêta ãhraa.

Desano

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 19 Dec 2025 from source
files dated 1 May 2025

17771afc-c309-57fd-9ff3-2d5a0cd59ff1